

薛氏二十四種

小兒直訣

一ヨリ四止

中武  
584  
19



明中武  
卷 584  
19

校註錢氏小兒直訣序

古諺有云寧醫十男子莫醫一婦人寧醫十婦人莫醫一小兒  
病難治者皆為無所承據也中古始有巫方氏作顛顛經以占  
夫壽判疾病死生而小兒方行焉逮於晉宋江左蘇氏齊之徐  
王僉能相傳有驗而後踵武厥科者則不止於一家矣至宋神  
宗時有太醫丞錢仲陽氏貫陰陽於一理合色脉於萬全偉論  
雄才迥邁前列可謂傑起而振出者也門人閻孝忠記其典要  
緝成直訣若干卷而幼穉之色脉症治無遺漏矣先君嘗語余  
曰幼幼之藥宜善調之古謂小兒為芽兒如草之萌如水之濕  
故其命方曰保嬰曰全勇者蓋不欲以峻攻耳錢氏之藥可以  
日用錢氏之方可以時省也愚服膺先人之言僅有年矣遇施

之治有一得驗者輒自識之用補註於錢文之下同勿其勿不  
敢以紫亂朱以薰並蘭也非特以錢氏峻攻為不可用也視古  
既遠元氣亦殊不欲直施之於今耳敬以一得之愚附續貂尾  
更覲明哲者正諸時

嘉靖辛亥孟春前奉政大夫太醫院院使薛已謹書

錢氏小兒直訣目錄

卷之一

診察脈色

脈法

五臟虛實寒熱

心臟症

肺臟症

變蒸

五臟相勝

肝病秋見

腎病夏見

驚風

面部症

目內症

肝臟症

腎臟症

脾臟症

心病冬見

脾病見四季

肺病春見

錢氏小兒直訣目錄

急驚風症 慢驚風症 胎驚風症  
發搐

早晨搐 日午搐 夜間搐 傷風搐  
傷食搐 百日内搐

癲癇症

心癲 肝癲 脾癲 肺癲 腎癲

諸瘡

痘疹 丹瘤

傷風兼變症

貪睡 手足冷 自利 腹脹 吐瀉身溫涼熱

熱渴

諸經發熱

潮熱 壯熱 風熱 溫壯

卷之二

吐瀉症

夏秋月吐瀉 傷熱吐瀉

傷冷吐瀉 初生吐瀉

咳嗽症

八九月間嗽 十一十二月間嗽 五七月間嗽

卷之三

諸疳症

肝疳 心疳 脾疳 肺疳 腎疳 無辜疳

腹痛腫脹諸症

積痛 蟲痛 脹喘 腹中有癖

五臟雜症

喜汗	盜汗	胃怯汗	六陽虛汗
夜啼	驚啼	撮口	弄舌
解顛	胎肥	胎執	胎怯
急乳不下	龜胸龜背	腎失音	黃病
黃疸	胎疸	行遲	齒遲髮遲

目錄畢

錢氏小兒直訣一卷

薛氏醫按

宋錢仲陽著 閻孝忠集

明薛 已註 魏一元校

脈法

脈弦急 氣不和 脈沉緩 傷食 脈促結 虛驚 脈浮 為風 脈沉細 為寒

脈亂 不治

薛按脈者人身之造化病機之先見用藥之準繩不可不先明諸心者也全幼心鑑云小兒一歲以前看虎口食指寅卯辰三關以驗其病脈紋從寅關起不至卯關者易治若連卯關者難治若寅侵卯卯侵過辰者十不救一其脈紋見有五色如因驚必青瀉痢色紫當以類而推之一歲後則可用一指轉側辨其三部脈弦急浮沉四五歲後脈七八至而細數

者為平九至者傷十至者困六至五至者為虛為寒弦緊者為風癘弦急為客忤其變蒸者脈必散亂骨間有熱脈則沉數若浮而不調為鬼祟浮大而數為風熱伏結為物聚微細為疳積為腹痛浮而洪為有蟲浮而遲為胃寒此論脈之大要耳然小兒血氣未實驚則氣散氣散則脈亂矣又當參以三部五脈三部者乃看面上氣色虎口脈紋寸口一指脈五脈者上按額前下診太衝并前三部謂之五脈也治法雖分虛實然實者病氣實而形氣虛也虛者形氣病氣俱虛也經云真氣奪則虛邪氣勝則實又云虛則補其母實則瀉其子東垣先生云形病俱實當瀉之形病俱虛當補之

面部症

左腮為肝右腮為肺額上為心鼻為脾頰為腎若色赤者熱也

宜隨症治之

薛按左腮屬肝其色青者為順白者為逆若色赤主肝經風熱發熱拘急青黑主驚風腹痛淡赤主潮熱痰嗽右腮屬肺其色白者為順赤者為逆若赤色甚者主咳嗽喘急悶亂飲水傳於腎則小便赤濇或淋閉不通額上屬心其色赤者為順黑者為逆若青黑主驚風腹痛痰癆啼哭微黃主盜汗頭髮乾燥驚疳骨熱鼻屬脾其色黃者為順青者為逆若色赤主脾經虛熱飲食少思深黃主小便秘而鼻燥衄血頰屬腎其色黑者為順黃者為逆若色赤主腎與膀胱有熱而小便不通

目部症

目內色赤者心實熱導赤散淡紅者心虛熱生犀散青者肝實

熱瀉青丸淡青者肝虛熱地黄丸黃者脾實熱瀉黃散微黃者脾虛熱益黃散白而混者肺實熱瀉白散目無睛光者腎虛也地黄丸主之

薛按目者五臟之精華各有所主白睛屬肺黑睛屬肝上下眼胞屬脾紅脉屬心瞳人屬腎此五臟之正色也然白睛本屬肺而見紅色此心尅肺之賊邪也見青色此肝乘侮之微邪也見黑色此腎乘肺之虛邪也見黃色此脾乘肺之虛邪也餘倣此

### 五臟虛實寒熱

心主驚實則叫哭發熱飲水而搖虛則困卧而悸○心熱則合面腫或上竅咬牙者導赤散主之○心氣實而喜仰卧者瀉心湯主之

薛按前症若心小腸實熱宜治以前藥若心脾血虛用五味異功散加當歸若因心血不足用秘旨安神丸若肝心血燥用柴胡梔子散若因肝心血虛用六味地黄丸若因脾虛食鬱生痰而驚悸不安者宜用四君子以健脾神麩麥芽以消導山梔柴胡以清熱如用前方病氣雖去前症仍作急調補元氣或反甚急溫補元氣凡此多因妊娠厚味七情或小兒乳哺失宜或乳母飲食鬱怒所致病氣既見形氣已虛必當推其所因而以助胃壯氣為主佐以治病之劑為善餘倣此肝主風則面青目直叫哭壯熱頂急煩悶虛則咬牙呵欠○肝熱則手尋衣領及亂捻物瀉青丸主之壯熱飲水喘悶瀉白散主之

薛按前症若肝木實熱生風而自病肺金實熱而尅木者宜

用前二藥以瀉其邪氣之實若肝經風熱而木直等症者用柴胡梔子散以清肝火加味四物湯以養肝血若腎虛而咬牙諸症者用六君子湯以健脾土六味地黃丸以滋腎水苟不審其症之虛實而妄用前藥則虛虛之禍不能免矣肝有風則目連劄得心熱則發搐或筋脉牽而直視用瀉青丸以治肝導赤散以清心。肝熱則目赤或兼青發搐者亦用前二藥風甚則身反張強直用地黃丸以補腎瀉青丸以治肝薛按前症若肝經實熱而自病宜用瀉青丸若肝經血燥而自病用抑肝散腎水虛不能生肝者宜用地黃丸若脾土虛不能培木者宜用六君子湯凡肝經既病風火相搏則肝臟虧損若不固根本必變他症百出也脾主困實則身熱引飲用瀉黃散虛則吐瀉生風用異功散。

面白腹痛口中氣冷不思飲食或吐清水以益黃散溫補脾虛下利用調中丸。呵欠多睡者脾氣虛而欲發驚也

薛按前症若發熱作渴喜冷飲食或泄瀉色黃睡不露睛屬形病俱實宜用瀉黃散疎導之若發熱口乾惡冷飲食或泄瀉色白腫而露睛屬形病俱虛宜用異功散調補之若脾氣下陷者補中益氣湯升補之寒水侮土者益黃散溫補之肝木尅土者六君柴胡平補之若目睛微動潮熱抽搐吐瀉不食宜用秘旨保脾湯凡小兒諸病先當調補脾胃使根本堅固則諸病自退

愚治沈氏子吐瀉腹痛手足並冷余謂此脾土虛弱寒水所侮先用益黃散一劑諸症頓愈手足稍冷此寒水退而脾土虛弱也用異功散少加木香一劑却去木香再劑而痊



一小兒傷食發熱吐瀉腹痛欲服益黃散余曰內有丁香良姜非其所宜前症乃脾胃受傷而無寒症不信仍服前藥其痛益甚二便不通口舌糜爛而歿

肺主喘實則悶亂氣急喘促飲水虛則哽氣出氣。肺熱則手搯眉目鼻面用甘桔湯主之。肺盛復感風寒則胸滿氣急喘嗽上氣先用瀉白散以清肺氣後用大青膏以散風寒。肺怯則唇白用阿膠散補之。悶亂氣粗喘促哽氣者難治肺虛也。薛按前症若腠理不密外邪所感而肺病者用清肺丸若脾胃氣虛不能相生而肺病者用六君子湯若脾胃氣實大腸不利而肺病者用瀉黃散若心火炎燥肺金而肺病者用腎主虛者胎稟虛怯神氣不足目無睛光面白顛解此皆難育雖育不壽或更加色欲變症百出愈難救療或目畏明下窺者

蓋骨重而身縮也咬牙者腎水虛而不能制心火也皆用地黃薛按絜古先生云下窺者腎氣不足兩足發熱故不喜衣覆也蓋臍以下皆腎之所主緣心氣下行於腎部也所以宜用地黃丸壯水制火而補腎故凡此必待精血完固而後嫁娶庶可以免前患精血篇云男子精未滿而御女以通其精則五體有不滿之處異日有難狀之疾今小兒稟賦不足豈有不本於此哉詳見精血篇

變蒸

小兒在母腹中乃生骨氣五臟六腑成而未全自生之後即長骨脈五臟六腑之神智也變者易也自內而長自下而上又身熱故以生之日後三十二日一變蒸即智意有異於前何也長生臟腑智意故也何謂三十二日長骨添精神人有三百六十

五骨除手足中四十五碎骨外有三百二十數目生下骨一日  
十段而上之十日百段而三十二日計三百二十段爲一遍亦  
曰一蒸骨之餘氣一自腦分入眼作三十二齒而齒牙不及  
三十二數者由變不足其常也或二十八日即長二十八齒已  
下倣此但不過三十二之數也凡一周遍乃生虛熱諸病如是  
十周則小蒸畢也計三百二十日生骨氣乃全而未壯也故初  
三十二日一變生腎生志六十四日再變生膀胱其發耳與眦  
冷腎與膀胱俱主於水水數一故先變生之九十六日三變生  
心喜一百二十八日四變生小腸其發汗出而微驚心爲火火  
數二一百六十日五變生肝哭一百九十二日六變生膽其發  
目閉而赤肝主木木數三二百二十四日七變生肺聲二百五  
十六日八變生大腸其發膚熱而汗或不汗肺者金金數四二

百八十八日九變生脾智二百二十日十變生胃其發不食腹  
痛而吐乳此後乃齒生能言知喜怒故云始全也太倉云氣入  
四肢長碎骨於十變後六十四日長其經脈手受血故能行物  
足受血故能行立也經云變且蒸謂蒸畢而足一歲之日也師  
曰不汗而熱者發其汗大吐者微止不可餘治是以小兒須變  
蒸蛻齒者如花之易苗所謂不及三十二齒者由變之不及齒  
當與變日相合也年壯而視齒方明

薛按小兒變者變其情態蒸者蒸其血脉故三十二日一變  
每變畢則情態異常全嬰方論云變蒸者以長氣血也變者  
上氣蒸者發熱也輕則體熱虛驚耳冷微汗唇生白泡三日  
可愈重者寒熱脈亂腹疼啼叫不能乳食食即吐覘五日方  
愈古方以黑散子紫丸子主之竊謂此症小兒所不免者雖

勿藥可也况前藥乃屬峻厲非惟臟腑不能勝抑且反傷氣血慎之慎之余嘗見一小兒至二變發熱有痰投以抱龍丸一粒卒至不救觀此可驗矣若不熱不驚略無症候而暗變者蓋受胎氣壯實故也

### 五臟相勝症治

肝臟病秋見肝強勝肺而肺怯也宜阿膠散以補肺益黃散以補脾瀉青丸以治肝

薛按潔古張先生云肝勝肺則身熱發搐喘促氣短病見於申酉戌時此受所制而不能勝謂之真強若心乘肝為實邪壯熱而搐有力利驚涼驚二丸主之肺乘肝為賊邪呵欠而搐無力以地黃丸補肝以瀉白散治肺肝乘脾為賊邪多腫體重發搐瀉青丸主之腎乘肝為虛邪憎寒呵欠而搐羌活

膏主之大凡肝之得病必先察其肺腎然腎者肝之母金者木之賊非腎水不能相生必肺金鬼邪來尅故其源在肺先治其肺攻其鬼也其源在腎先補其腎滋其本也然後察其本臟之虛實而寒溫之徐用誠滑伯仁先生亦云然

心

薛按潔古云若喘而壯熱此肺乘心也為微邪用瀉白散若

補腎以導赤散治心

風熱相搏此肝乘心也為實邪用瀉苗散若恐怖畏寒腎乘心也身熱此脾乘心也為實邪用瀉苗散若恐怖畏寒腎乘心也為賊邪用安神丸太凡心臟得病必先調其肝腎腎為少鬼也肝氣通則心氣和肝氣衰則心氣乏此心病先求其肝清其源也五臟既病必傳其所勝則腎之受邪必傳於心故先治其腎遂其邪也若肝腎平和而心自病然後察其虛實而

肺病春見肺勝肝也以瀉白散治肺若目淡青或目赤者當發  
搐為肝怯也以地黃丸補肝

薛按潔古云肺病喘嗽氣盛見於寅卯辰時當補肝瀉肺若  
肺病久嗽宜補脾清心若心乘肺為賊邪熱而喘嗽用地黃  
丸導赤散阿膠散若肝乘肺為微邪惡風眩冒昏憤用羌活  
散若腎乘肺為實邪憎寒咳嗽清利用百部丸若脾乘肺為  
虛邪體重吐痰泄瀉咳嗽用人參白朮散大凡肺之得病必  
先察心脾二臟治之若心火亢盛上炎燔肺而肺為病宜先  
抑心氣若肺氣不足腠理不密風邪所感宜先補脾氣若中  
焦痞實大腸壅滯熱氣上蒸宜先理脾氣若心脾平和則治其本經  
腎病夏見木勝火腎乘心也甚則悸動發搐宣風散主之  
薛按潔古云心乘腎者為微邪發熱不惡風寒用桂枝丸肺

乘腎者為虛邪喘嗽皮膚寒澁用百部丸肝乘腎者為實邪  
拘急發搐身寒用理中丸脾乘腎者為賊邪體重泄瀉惡寒  
用理中丸大抵五行之間惟腎一臟毋盛而子反受邪然物  
之性有不可以一槩論者肺腎是也何則肺主氣肺有熱則  
熱得氣而上蒸不能下生於腎而腎受邪矣此腎之病源於  
肺也又有脾經之濕相刑於腎者法當解肺熱去脾濕若本  
經自病者宜滋補之

脾病見四傍皆倣此治之順者易治逆者難治脾怯當面目黃  
五臟相乘隨症治之

薛按潔古云凡脾之得疾必先察其肝心二臟之虛實而治  
之蓋肝者脾之賊心者脾之母也肝氣盛則賊邪勝心氣虧  
則脾氣虛故肝乘脾則風瀉而嘔茯苓半夏湯主之若心氣

實而壯熱體重泄瀉羌活黃芩蒼朮甘草湯主之若肺乘脾而咳嗽便秘飲食如常者煎檳榔大黃湯下葶藶丸若腎乘脾而惡寒泄瀉理中丸之類主之竊謂五臟之症相乘伏匿隱顯莫測然病機不離五行生尅制化之理况小兒未有七情多因形體怯弱血氣未全故有五臟勝乘之病更當調治其母若專治其子多致誤矣

### 急驚風症治

小兒急驚因聞大聲或驚而發搐搐止如故此熱生於心身熱面赤引飲口中氣熱二便黃赤甚則發搐蓋熱盛生風陽盛而陰虛也宜以利驚丸除其痰熱不可用巴豆之藥

薛按秘藏保嬰集云急驚之候牙關緊急壯熱涎湧竄視口張搐搦顫動口中氣熱頰赤唇紅脉浮洪數者此肝經血虛火動生風蓋風生則陰血愈散陰火愈熾火動則肺金愈虧肝木愈盛宜滋肝血養脾氣若屢服祛風化痰瀉火辛散之劑便宜認作脾虛血損急補脾土若風火相搏發熱抽搐目矜筋攣痰盛者用四物鈞藤鈞以生肝血清肝火用四君子加當歸以補脾土生肺金若肝經血燥發熱驚搐目矜筋攣痰盛者用六味丸以滋腎水四君子以補脾土若肺金尅肝木用六君子湯以實脾土加芍藥木香以平肺金若屢服驚藥而脾胃虛寒者須用六君子湯以補脾胃丁香木香以培陽氣否則必變慢驚

愚治一小兒因驚發熱抽搐顫悶咬牙作渴飲冷大便秘結面色青赤然印堂左顙赤甚此心肝二經風熱相搏乃形病俱實之症先用瀉青丸料加炒黃連煎服一劑大便隨利熱

搐頓減用抑青丸一服諸症悉退但面色痿黃形氣倦怠飲食少思此病氣去而形氣虛也用補中益氣湯及地黃丸而安  
一小兒發熱抽搐口禁痰湧此急驚風也先用瀉青丸一服六味丸二服諸症頓退又用小柴胡湯加芎歸山梔釣藤釣而安繼以補中益氣湯而愈

一小兒六歲忽然發搐目動咬牙或睡中驚搐痰涎湧盛或用化痰祛風面色青黃此肝木尅制脾土不能攝涎而上湧也當滋腎水生肝血則風自息而痰自消用六味丸而愈  
一女子十二歲善怒睡中驚搐遍身作痒飲食少思此肝火風熱脾土受侮用參朮柴芩湯以清肝火涼肝血健脾胃而愈  
一小兒三歲患急驚面赤發熱作渴飲冷先君已用瀉青丸一服勢去大半翌早又自用前丸一服即吐瀉發搐面色青

白手足指冷余以為脾胃受傷用六君子湯加羌桂升麻柴胡一劑頓安前哲謂小兒易為虛實攻伐之藥中病即止不可過劑我先蓋守此法

一小兒三歲因驚抽搐發熱痰盛久用抱龍丸等藥面色或赤或青此肝心二經血虛風熱用六味丸滋養肝腎佐以六君加柴胡升麻調補脾胃而愈

嘉興王舉人女七歲因跌傷腿膝兩膝腫潰左顛色青左關脈無余意驚則氣散而風熱鬱滯先用四君子加升麻柴胡防風釣藤生血補肝而愈

### 慢驚風症治

小兒慢驚因病後或吐瀉或藥餌傷損脾胃而肢體逆冷口鼻氣微手足痠痿昏睡露睛此脾虛生風無陽之症也溫白丸主

薛按保嬰集云急驚屢發屢用直瀉則脾損陰消而後為慢驚者當補脾養血佐以安心清肺制木之藥最為切當竊謂前症多因脾胃虧損肝木所勝但用五味異功散加當歸佐以釣藤飲子以補脾土平肝木亦多得效如不應加六君加炮姜木香溫補脾土更不應急加附子以回陽若用逐風驅痰之藥反促其危也每見小兒脾胃弱者一病即成慢驚不可泥為久病誤藥而後成也內經云為慢脾風言脾虛受病也其意可見矣

王氏子患吐瀉或用藥下之睡而露睛瘦瘠身冷此慢驚也則用括萸湯治之而目開身溫但二便不利或用八正散身復冷不食即用益黃散史君子丸溫補脾胃諸症悉愈後又不語用地黃丸以補腎半月而愈

愚治一小兒停食吐瀉先用尅滯之劑更加咬牙發搐面色青白手足指冷眉唇抽動余以為脾胃虛弱因藥復傷肝木所乘而成慢驚矣遂用六君子加木香柴胡升麻二劑頓安大凡傷食停滯見發搐等症且勿用藥待宿食化盡胃氣漸健而自愈設若強與飲食或誤用藥餌不惟甚其所有而且生其所無矣

舉人余時正子傷食發丹服發表之劑手足抽搐服抱龍丸日曬痰盛余謂脾胃虧損而變慢驚矣用六君加附子一劑而安再劑而愈

一小兒患抽搐涎自流或用驚風之藥益甚視其面色黃白余用六君子補中益氣二湯而愈

小兒初生壯熱吐衄身體強直手足抽掣目反直視是胎驚風也

薛按前症多因娘婦忿怒驚恐調攝乖常或挾外邪內傷於胎蓋母有所觸胎必感之當用猪乳膏拭兒口中或用惺惺散加漏蘆令母煎服使藥通乳中兒病自愈矣

### 發搐症治

驚癇發搐男則目左視無聲右視有聲女則右視無聲左視有聲相勝故也故有發時之症

薛按前症多因胎中受惠或乳母鬱怒傳兒或小兒乳傷自病其症吐乳面青若痰實壅積則壯熱面紅當兼調治其母切不可損其元氣若欲驗逆順男則握拳拇指入食指中為順於外為逆女則叉入食指為逆於外為順仍參乳不能類以治其母後倣此

王駙馬子五歲目直視而不欲食或以為鬼崇用符水噴之反

加發搐此肝經實火之症也用瀉青丸而愈

愚治少叅王陽湖孫跌傷股骨正體科接之余視其面青而兼黃口角微掣動此肝木侮脾症也且氣血筋骨皆資脾土而生但壯脾氣則所傷自愈遂用六君子加釣藤釣當歸三十餘劑諸症悉愈

李寺丞子三歲病搐發而目右視大叫哭師曰逆也凡男目右視有聲金木相戰故也當瀉其強而補其弱遂用瀉肺湯肺病退又用地黃丸補腎用涼驚丸瀉青丸瀉心肝而愈此症男反女故男易治於女也假令女發搐目左視肺之勝肝又病在秋即肺旺肝不能任故哭叫當大瀉其肺然後治心續肝所以言男目右視者木反侮金肝旺勝肺當瀉其肝若更病在春夏金氣極盛又當補其肺慎勿瀉也



愚治一小兒兩目連劄手足發搐頰服天麻防風丸之類益甚得飲則稍愈視其鼻準及左頰色青黃此肝木制脾土用六君子加升麻柴胡釣藤鈎二劑而愈又用補中益氣湯而若寅卯辰時身體壯熱日上視手足動搖口出熱涎頸項勁強此肝旺也當補腎治肝用地黃丸瀉青丸主之

薛按前症若煩熱作渴飲冷便結者宜用瀉青丸若發熱飲溫大便不結者宜用柴芍參苓散若自汗盜汗腎虛液不歸源也用地黃丸若服峻劑或久病流涎脾虛涎不歸源也用六君子湯所云肝旺者乃肝虛而邪氣旺也故先補其母後瀉其子一小兒寅卯時發熱或兼搐有痰服抱龍瀉青二丸而愈後復患仍用前藥以致咳嗽氣喘不時發搐面兼赤色或青黃或浮腫或流涎余謂咳嗽氣喘脾肺氣虛也不時發

搐木乘土也面青赤黃肝入心脾也浮腫流涎 氣虛也用益智丸以補心氣補中益氣湯以養脾肺而愈

若巳午未時發搐心神驚悸竄視睛赤牙關緊急口中流涎手足動搖此心旺也以地黃丸補肝導赤散涼驚丸治心

薛按前症屬邪氣實而真氣虛故用地黃丸其流涎不止為心火虛而脾土弱也佐以六君子湯

廣親七大尉病潮熱師曰七使將安八使預防明午驚搐既而果然遂用藥瀉心肝補腎水而愈蓋見其坐石枕目直視而腮赤乃心肝俱熱午時者心肝用事也

愚治一小兒巳午時發熱驚悸等症發時形氣倦怠面黃懶食流涎飲湯余以為心氣不足所致不信反服涼心藥更加吐瀉睡而露睛幾至慢脾風先用六君子加姜桂佐以地黃丸而愈

一小兒七歲因驚久患搐熱後午未時益甚形氣倦怠熱定飲湯余謂心脾氣虛朝用補中益氣湯加益智仁夕用六君子加當歸鈎藤鈎而尋愈後因飲食過多吐瀉或用保和丸治之加寒熱發搐此脾土復傷而肝木所侮余用六君子柴胡治之寒熱止而飲食進但巳午未時去後用補中益氣湯加茯苓半夏鈎藤鈎而愈

若申酉戌時微搐而喘目微斜身似熱睡而露睛手足逆冷大便淡黃肺旺也當用益黃散以補脾導赤散以治心瀉青丸以治肝薛按前症屬脾土真寒不能生肺氣而假熱故宜益黃散以補肺金之母如用六君子炮薑尤效若手足不冷屬虛弱用五味異功散木香共導赤散瀉青丸初病元氣未虛者酌量用之若久病元氣已虛者必用六君子湯秘旨安神六味地黃

### 二九主之

徐氏子三歲日晡發搐身微熱目微斜露睛作喘四肢逆冷大便微黃師曰此肝實發搐也晡熱肺用事也身溫肺虛也目斜露睛肝木相勝也四肢逆冷脾氣虛寒也若脾肺虛而木乘土之症當先用益黃散膠散以補脾肺後用瀉青丸導赤散涼驚丸以治心肝如法而愈

一小兒潮熱自申酉時熱至子丑時方止遍身似疥大便秘結小便赤澁熱渴飲冷此脾胃實熱而傳肺大腸也先用清涼飲四劑結熱始退又用四物加柴胡黃連數劑其瘡漸愈彼欲速効另用槐角丸之類諸症益甚遂請施院長治之亦同余藥惟加桃仁赤芍二味至百劑而愈

一小兒先停滯飲食服尅伐之藥致面色痰黃體倦少食申

酉時潮熱余欲用調補之藥不信更用清熱消導益加泄瀉  
余用六君子數劑又用補中益氣湯而愈

一小兒酉戌時熱面赤腹中作痛按之益甚服峻厲之劑下  
五七次發搐吐痰作渴腹痛按之却不痛此脾胃復傷而變  
症也用七味白朮散補中益氣湯頓安

一小兒飲食停滯服消導丸藥余曰此因脾胃虛而食停滯  
也當調補為善已而申酉戌時潮熱食少作渴大便不實用  
四君子湯而飲食進又用補中益氣湯而諸症愈

若亥子丑時微搐身體發熱目睛斜喉中有痰大便白色多  
睡不省當用益黃散以補脾導赤散涼驚丸以治心

薛按前症屬形病虛寒宜用六君子加炮姜溫補脾土用清  
心安神丸六味丸調補心血潔古張先生云此症皆因大病

後脾胃虧損所致其旨明矣若非六君子湯以固本必變慢  
脾風也

朱監簿子五歲夜半發熱曉則如故用涼藥解之反多涎喜睡  
大便青白作渴引飲師曰此當健脾胃則諸症退遂用白朮散

一兩水煎恣飲二劑稍愈三劑渴止涎消又投阿膠散二服而  
愚治一小兒亥子丑時發熱泄瀉用益黃散而愈後復發服

前藥嗜卧露睛作渴少食大便頻黃余謂肝勝脾虛元氣下  
陷用補中益氣湯佐以地黃丸而尋愈

若傷風發搐口中氣熱呵欠頻悶手足動搖當以大青膏發之  
薛按潔古先生云傷風發搐當辨有汗無汗用大青膏小續

命湯竊謂前症若口中氣熱搐而有力屬形病俱實宜用大  
青膏以散風邪若口氣不熱搐而無力屬形病俱虛宜用異

功散以補脾土六味丸以滋肝木釣藤飲以清肝火若因風邪鬱熱而變見諸症當理肺經清風邪若外邪既解而諸症不愈當實脾土補肺金若徑治其肺恐脾氣復傷諸症蜂起起矣一小兒傷風鼻塞流涕服藥過重發搐呵欠頓悶汗出氣喘久不愈其母因勞役發熱余用補中益氣湯時以五七滴與兒飲之母子並愈

一小兒傷風發搐痰盛喘急余謂此脾肺氣虛勝理不密而外邪所乘用六君加柴胡升麻桑皮杏仁一劑痰喘悉退又一劑去桑杏加釣藤鈎而安乃用異功散數劑後不復發此症若不補脾胃實勝理專治痰邪鮮有不誤

若傷食後發搐身溫多睡或吐不思食者宜先定搐搐止用白餅子下之後用安神丸主之

薛按前症若飲食停滯嘔吐不食腹脹便秘者屬實熱宜用白餅子下之若下後搐熱益甚嘔吐不食者屬虛熱用異功散補之若脾胃既傷肝木所勝用六君加釣藤鈎以健脾氣平肝木大凡飲食而不愈但調補脾胃則諸邪自退矣

一小兒七歲發熱驚悸服祛風化痰藥更惡寒吐痰喘嗽腹痛少食又服抱龍丸大便似痢寒熱往來殊類風症先兄以為脾氣本傷藥復損之諸經無所資養而然也用四君子湯少用升麻柴胡以升補陽氣而愈

一小兒傷食發熱抽搐嘔吐氣喘痰嗽屬脾肺氣虛以六君子加炒黑黃連山梔各二分一劑而頓安

一小兒三歲停食吐瀉或用尅滯之劑更咬牙發搐面色青白鼻準青而兼黑手足指冷眉唇抽動此脾胃虛弱而肝木

乘之用六君子加木香柴胡升麻二劑頓安

百日內發搐真者不過兩三次必死假者頻發不死真者內生驚癇假者外傷風冷血氣未實不能勝任故發搐口中氣熱用大青高塗顛浴體二法

薛按前症多因胎中受患或乳母鬱怒傳兒或兒脾傷自病當固元氣為主而兼調治其母仍參吮乳不能類治之後倣此李司戶孫百日發搐日三五次或作胎驚治之不應即用大青膏豆許并塗顛浴體二法三日而愈蓋嬰兒血氣未實不能勝外邪而發搐故用浴體法凡搐頻者風在表易治宜發散搐稀者風在臟難治宜補脾

愚治一小兒百日內患抽搐痰涎自流用驚風藥益甚視其面色黃白仍用六君子補中益氣二湯而愈

一小兒面色青黑或痿黃審其母素有鬱怒所致用加味逍遙散加味歸脾湯治其母其子亦愈

一小兒月內發搐鼻塞余以為風邪所傷以六君子加桔梗細辛子母俱服更以葱頭七莖生姜一片細搗攤帛上兩掌護溫貼子顛間半胸鼻利搐止

一小兒未兩月發搐嘔乳腹膨作瀉余以為乳多傷脾胃用五味異功散加漏蘆母服之子服數滴而尋愈

### 癩癇症治

凡治五癩皆隨臟治之每臟各有一獸之形並用五色丸治小病也發而重者死病甚者亦死若反折上竄其聲如犬症屬肝也若目瞪吐舌其聲如羊症屬心也若目直腹痛其聲如牛症屬脾也若驚跳反折手縱其聲如鷄症屬肺也若肢體如尸口

吐涎沫其聲如猪症屬腎也

薛按妊娠若遇驚恐則必內應於胎故一月足厥陰脉養驚則肝受病二月足少陽脉養驚則胆受病三月手少陰脉養驚則心受病四月名為離經五月足太陰脉養驚則脾受病六月足陽明脉養驚則胃受病七月手太陰脉養驚則肺受病八月手陽明脉養驚則大腸受病九月足少陰脉養驚則腎受病是臟腑納氣於丹田自肝至腎十經滋養而生此則胎中所致也若既生之後或驚怪所觸或乳哺失節或乳母飲食起居六淫七情臟氣不平亦致是症須察見症屬於何經更別陰陽虛實以調補脾胃為主否則不時舉發甚至不愚治一老生子周歲秋初暴冷忽發指似痛搐過則氣息淹此元氣虛弱所致用補中益氣湯而安

一小兒十歲一小兒七歲各有癩症歲發二次後因出痘及飲食停滯舉發頻數並用六君子補中益氣二湯頓安

一小兒六歲忽然發癩目動咬牙或睡中驚搐口流痰沫服化痰祛風之藥益甚而面色兼青乃屬肝木剋制脾土而不能攝涎故上湧也當滋腎水生肝血則風自息痰自消矣用六味丸而愈


一小兒十三歲因驚患癩服硃砂丸之類而愈後每發徹服前丸不應或謂風涎內積服藥下之發作日頻恪服鎮驚等劑益甚余以為心脾二經氣血虧損而痰涎留滯朝用補中益氣湯夕用斷癩丹漸愈出痘瘡後其癩復作仍用補中益氣湯為主佐以八珍湯及蟬蛻釣藤飲而愈

附面部三指診候圖



小兒半歲之間有病以名中  
 食三指曲按額前眉上髮際  
 之下若三指俱熱感受風邪  
 鼻塞氣粗三指俱冷感受風  
 寒臟冷吐瀉若食中二指熱  
 上熱下冷名中二指熱夾驚  
 之候食指熱胸膈氣滿乳食  
 不消附

附虎口三關脈症圖



小鏡訣云陰陽運合男女成形已分九竅四肢乃生五臟六腑  
 部位各分逆順難明若憑寸口之浮沉必乃橫亡於孩子須明  
 虎口辨別三關消詳用藥必無差誤未至三歲看虎口三關若  
 脈見風關尚易治交氣關則難治交命關為死症又當辨其色  
 如獸驚三關必青水驚三關必赤人驚三關必黑若紫色主瀉  
 痢黃色是雷驚三關脈通度乃極驚之症必死有紋或青或紅  
 如線直者是母食傷脾左右一樣者是驚積齊發紋有三條主

肺傷風痰或胸膈聲青主傷寒及嗽紅主泄瀉有黑相兼主下痢紅多白痢黑多赤痢有紫有兼虎口脉亂乃氣不和也蓋脉紋見有五色由其病甚色能加變至於純黑者不可得而治附

### 五臟瘡疹證治

小兒在胎食五臟血穢伏於命門若遇天行時熱或乳食所傷或驚恐所觸則其毒當出初起之候面燥腮赤目胞赤呵欠頻悶乍涼乍熱咳嗽噴手足稍冷驚悸多睡宜究其何臟所發察其何因所起令乳母亦須節飲食慎風寒○五臟各有一症肝臟水疱色青而小肺臟膿疱色白而大心臟癩色赤而小脾臟疹小次癩故色赤黃淺也先發膿疱後發疹子者順先疹子後癩子者順反此為逆惟腎無候但見鼈冷耳冷是也若寒水來侮故黑陷而耳鼈反熱為逆也急用百祥丸牛李膏各三

服不愈者死○如發潮熱三日以上出不甚多而熱不止者未盡也潮熱隨出如早食潮熱不已為水疱之類也一發便出盡者重瘡夾疹者半輕半重也出稀者輕裡外微紅者輕外黑裡赤者微重外白裡黑者大重也瘡端裡黑點如針孔者勢最劇也青乾紫陷昏睡汗出煩燥熱渴腹脹啼喘二便不通者困也

有大熱利小便解熱毒若紫黑乾陷或寒戰咬牙或身黃腫紫者急以百祥丸下之復惡寒不已身冷出汗耳鼈反熱者死症也此腎氣大旺脾虛不能制故耳下後身熱氣溫飲水者可治以脾土勝腎寒去而溫熱也不黑者不可下下則內虛歸腎大抵瘡疹屬陽在春夏為順秋冬為逆冬月腎旺盛寒病多歸腎變黑又當辨春膿疱夏黑陷秋癩子冬疹子者十活四五黑者十難救一○身熱煩渴腹滿而喘便澀面赤悶亂大吐此當利



小便不瘥者宣風散下之若能食而痲頭焦起或未食而喘實亦可下之若五七日痲不焦是內熱也宣風散導之生犀汁解之○癩疹作搐為脾虛而肝則乘心火妄動風熱相搏也當用括萎湯瀉心肝補脾土○瘡黑而忽便膿血并痲皮者乃脾氣實腎邪退而病安也及瀉而乳食不化者脾虛不能制腎故難薛按痘疹大要與癩疽治法無異宜辨表裏虛實寒熱蓋表虛而用發表之劑輕則癩爛重則不能起發而死裡實而用托裡之劑輕則患痘毒重則喘急腹脹而死裡虛而用疎導之劑輕則難以貫膿結痲重則能結壓落壓而死治者可不慎哉若骨赤發熱疼痛作渴飲冷便秘此形氣病氣俱實也雖在嚴冬必用四順清涼飲以救其陰若黑陷不食嘔吐泄瀉寒戰咬牙手逆冷此脾土虛敗寒水所侮也雖在盛暑必

用六君羌附或十二味異功散以回其陽此內經捨時從症之法也若起發遲不紅活不作膿不結痲或發熱作渴飲食少思此脾胃虛弱也用參芪四聖散以補之若雖起而色白雖貫膿而不滿雖結痲而不落或痒塌作渴飲湯腹痛不食嘔吐泄瀉此脾胃虛寒也用十一味木香散以溫之其在四五日之間死者毒氣盛真氣虛而不能起發也六七日之間死者元氣虛而不能貫膿也旬日之外死者邪氣去脾胃敗而元氣內脫也治者但能決其死而不知其死必本於血氣虧損苟能逆推其因而豫為調補豈斷無生理哉蓋起發貫膿結痲三者皆由脾胃榮養不可妄投剋伐之劑以致其天枉也至於大人患此治法迥異昔丹溪嘗治一老人初患痘昏憤不知亟用大補四十餘劑遂出逗而愈觀此可見

陸親一大王病瘡疹先用抱龍丸解之彼另用藥下之其疹稠密余曰瘡疹始出未有他症但用平和之藥解之如三日不出或出而不快宜微發之更不出當再發之出而不多脉平和無他症者瘡本稀少不可更發若瘡起發能食者六黃丸下一二行若初起就用下劑則裡虛瘡不能盡出而稠密難治至三日其瘡黑陷喜不寒戰遂用百祥丸牛李膏各一服瘡復紅活而愈蓋黑者歸腎也腎旺勝脾故脾虛寒戰則難治所用百祥丸瀉膀胱之邪自不盛也

五太尉因墜鞦韆患急驚發搐或用表散之藥不愈此急驚當先退其熱以太黃丸玉露散惺惺丸加牛黃龍腦解之至三日肌膚尚熱余曰再二日不愈必發痘瘡已而果然用必勝散七日而愈此乃初因誤散其表內熱不止而癰自生也

十大尉瘡疹未出何欠頗悶驚悸乍涼乍熱手足冷面頰赤咳嗽時嚏此五臟症具也以其別無他候故未發出若已出則歸一臟也用抱龍丸數服瘡疹出而諸症愈 治見校註痘疹方

丹瘤

丹瘤之症因熱毒客於腠理搏於氣血發於皮膚當以白玉散薛按前症或命門所稟或風熱相搏或類浴熱湯或類着烘衣或傷食發熱或乳母膏梁厚味七情鬱火皆能致者其赤暈遊走者乃血隨風熱也若稟胎毒用化毒丹風熱者敗毒散類浴烘衣者四物連翹山梔飲食發熱者四君柴胡神麴毋食厚味者加味清胃散毋有鬱火者加味逍遙散俱加漏蘆毋子俱服白玉散其性大寒能解熱毒若毒發於四肢而輕淺者宜用若延及胸背脇腹者為重須用活命飲令人用

力於各患處遍吮毒血各聚於一處急砭出之若肚腹膨脹  
二便不通毒入內也用大連翹飲亦有生者

愚治史少叅孫丙申正月陰囊赤腫余作胎毒治之而瘥後  
患發熱痰熱等症診其母有鬱火血熱用解鬱涼血之藥子  
母俱服而愈至六月初患吐瀉小便赤澀兩眼睜動投參朮  
之類不應或以為慢驚余視其寅卯關脈赤此屬風熱用柴  
胡清肝散加釣藤鉤木賊草一劑即愈至丁酉正月頸患熱  
毒潰而膿出感風發熱翌日頭面黯腫如斗急砭出黑血二  
盞許隨用清熱化毒湯腫退七八翌日又砭各處血不其黑  
仍用前藥去牛蒡子加熟地黃而愈此症若砭緩則血凝滯  
或為破傷風而死

一小兒患之外勢雖輕內苦便閉此患在臍也服大連翹飲

驚風功散而瘥

一小兒腎患之赤暈走胤令人頻吮便其毒各聚一處乃砭  
出黑塗以加味神功散時以金銀花甘草節為末入乳汁調  
服而愈月餘後兩足赤腫仍治以前法而痊數日後兩足復  
赤或用犀角解毒之類乳食不進肚腹膨脹此復傷脾胃也  
伊以前藥服補中益氣湯加茯苓而瘥神功散甚效但砭處  
微痛用太乙丹亦效  
一小兒患之神思如故乳食如常此毒發于肌表余謂宜  
砭泄其毒不必服藥不信外敷寒涼內服峻厲致腹膨脹乳  
食不進而歿夫寒涼外傷脾氣峻劑內傷生氣不死何俟  
一小兒兩足常患腫似丹毒而不覺發飲水痰盛兩頰赤色  
先見以為稟腎經虛火用地黃丸料令母子俱服而愈  
一小兒兩足生瘡疥赤暈如丹火而不愈亦用地黃丸而痊

一 小兒腿如霞遊走不定先以蘇油塗患處取出惡血其毒  
卽散更用九味解毒散一劑而安

一 小兒因母酒後飲其乳困睡不醒遍身如丹瘤狀余以爲  
酒毒傳兒爲患令母子俱服葛根解醒湯而愈

一 女子赤暈如霞作痒發熱此肝經血熱用小柴胡加生地  
連翹丹皮而愈凡女子天癸將至婦人月經不調被驚着惱  
多有此症亦治以前藥

### 傷風兼變症治二

傷風貪睡口中氣熱呵欠頤悶用大青膏發散之若飲冷不止  
而善食者用大黃丸微下之餘不可下也。傷風手足冷者脾  
臟怯也當以益黃散溫脾胃以大青膏散風邪。傷風自利脾  
臟虛怯也亦用益黃散大青膏未瘥用調中丸有下症用大黃

丸後服溫驚丸。傷風腹脹或作喘脾臟虛也當先發散仍補  
脾。傷風兼肝則發搐頤悶兼心則驚不安兼肺則喘嗽嘔氣  
兼脾則困睡兼腎則目畏明各隨補其母。傷風多睡能食引  
飲吐瀉大便色黃此胃虛熱也當先用白朮散以生津後用大  
青膏以發散。傷風吐沫瀉色青白悶亂不渴噎氣出氣睡而  
露睛先用益黃散後用大青膏。傷風或涼或熱多睡氣粗大  
便黃白嘔乳不消不時咳嗽先用大青膏後服益黃散慎不可  
下。傷風誤用下藥而作渴飲水者此胃亡津液而虛熱也多  
用白朮散熱渴自止

薛按大青膏乃表散之劑必外邪蘊結於肺而肺氣未虧損  
者方可用之大黃丸乃疎利之劑其食痰積滯於胃而胃氣  
尚充實者乃可施之况前症屬脾肺氣虛腠理不密外邪所

乘又當臨症制宜必以固脾胃為主若蒸肢冷自利腹脹喘  
嗽者脾肺虛寒也六君子加木香升麻桔梗若兼驚悸痰甚  
飲食少思屬心脾臟虛也四君加芎歸酸棗仁若兼肢體倦怠  
喘嗽噎氣脾肺氣虛也六君當歸桔梗若兼目畏明白睛多  
腎氣虛也六味丸加五味鹿茸如未應更用補中益氣湯加  
五味子乾山藥以補腎母若多睡能乳飲水吐瀉大便色黃  
脾氣虛而下陷也補中益氣湯升補元氣若吐沫瀉青而露  
睛脾虛木所乘也六君子加升麻柴胡調補脾氣若乍涼乍  
熱喘嗽氣粗大便黃白嘔乳不消脾肺氣虛而有邪也先用  
惺惺散後用四君子湯若僕用下藥而作渴者脾胃之氣傷  
也用白朮散或六君子補中益氣二湯補之大凡前症若病  
邪急而元氣無虧者先用原方或用輕清表散之劑若元氣

不足者當如前法固其元氣則外邪自退若因病久或因服  
尅伐之藥而未愈或更加變症者但調補脾胃諸症自愈其  
小兒傷風發熱鼻塞或痰壅發搐多因乳母鼻吹顛門但服  
惺惺膏或用葱頭三莖細切搗爛以紙寸餘攤葱在上兩掌  
合葱待溫貼於顛門其邪即解乃去其葱却用絹段寸餘塗  
以麵糊仍貼顛門永無傷風之患

吳江史安卿子傷風用表散化痰之藥反痰盛咳嗽肚腹膨  
脹面色晄白此脾肺俱虛用六君子加桔梗一劑頓愈至三  
日前症又作鼻流清涕此復傷風寒也仍用前藥加桑皮杏  
仁而愈

史玄年子喘嗽胸腹膨脹泄瀉不食此飲食傷脾土而不能  
生肺金也用六君子湯一劑諸症頓愈史孔修子六歲感冒

咳嗽發散過度喘促不食痰中有血余曰此成肺癰也次日吐痰而兼膿用桔梗湯而愈後元氣未復大便似痢或以爲痢用五苓黃連枳實之類痰喘目劓四肢抽搐余曰此脾敗而變慢脾風也果歿

諸經發熱症治三

潮熱者時發熱過時即退來日依時而發此欲發驚也。壯熱者常熱不已甚則發驚癇也。風熱者身熱而口中氣熱乃風邪外感也。溫壯者肢體微熱也。發熱而不欲飲水者胃氣虛熱也用白朮散發熱而飲水作渴喜冷飲食者胃氣實熱也用瀉黃散

薛按秘藏保嬰集云小兒潮熱或壯熱不退多是變蒸及五臟相勝不必用藥又多食積鬱熱由中發外見於肌表只理

其中清陽明之熱而表熱自除不可認作外感用小柴胡輕利等藥重傷其內又潮熱不退恐是出痘亦當審察勿便用竊謂發熱飲水者熱在內不飲水者熱在外也又當以此辨之其諸熱症說見各類

朱監簿子五歲忽發熱腮唇色赤煩躁飲熱或用牛黃丸及一物瀉心湯加倦怠不食便利黃沫師謂心經虛熱而誤下之也先用白朮散以生胃中津液後用生犀散以治心經虛熱再與胡黃連丸而愈

鄭人齊姓者子忽發熱症自用青金膏三服連瀉五行加困睡發驚再一服又瀉二行益加口乾身熱虛癩師先煎白朮散與時時服之後用香瓜丸而愈

曹宣德子三歲面黃時發寒熱不食飲水或用牛黃麝香二丸

不愈用止渴乾葛散反吐師謂食伏於胃脘先以白餅子下之  
又以消積丸磨之而愈

愚治一小兒先壯熱便秘服清涼飲之類愈而復作服地骨  
皮散而潮熱不已服四物芩連之類不時而熱甚余曰不時  
而熱或晝見夜伏晝伏夜見是虛火也當滋化源不信仍服  
寒藥愈甚余夕用六味丸加五味子朝用補中益氣加山藥  
山茱萸而瘥

一小兒五歲發熱作渴右頤鼻準微赤或與冷水涼藥即時  
嘔吐余曰右腮微赤肺經虛熱也鼻準微赤胃經虛熱也此  
胃虛不能生肺耳先用四君子加升麻三分一劑而不吐又  
用白朮散一劑而不渴再用四君子四劑而頓安

一小兒發熱作渴用瀉黃散大便重墜口角流涎仍欲瀉火  
余曰鼻準青白脾虛肝木所侮也口角流涎胃氣不能攝涎  
也大便重墜脾氣不能升也不信另服涼藥果眉唇微動四  
肢微抽余曰此元氣虛極而變慢脾風也用六君加炮姜當  
歸木香釣藤鈎二劑益甚彼欲更劑余曰此藥力不及也設  
藥不對其症禍在反掌仍以前藥加炮附子一片服之即安  
乃去附子又二劑而愈

小兒直訣二卷

薛氏醫按

宋錢仲陽著 閻孝忠集

明薛 已註 魏一元校

吐瀉兼變症治

五月二十五日已後吐瀉壯熱此臟腑中九分熱也傷熱乳食  
 吐而不消瀉色深黃玉露散主之○六月十五日已後吐瀉身  
 溫臟腑六分冷也嘔吐乳食不消瀉色黃白口乾作渴者食前  
 少服益黃散食後多服玉露散○七月七日已後吐瀉身涼三  
 分熱七分冷也不乳多睡悶亂哽氣出氣睡臥露睛唇白多噦  
 亦用益黃玉露二散主之○八月十五日已後吐瀉身冷不乳  
 乾噦瀉青褐水無陽也當用益黃散吐瀉乳食不化時時下痢  
 肌肉消瘦此脾胃虛寒也用木香丸夏月不可服如有冷症則



少服之其身温壯熱或瀉痢紅黃赤黑此脾胃實熱也用黃連  
丸冬月不可服如有熱症則少服之

薛按前法卽內經用寒遠寒用熱遠熱之本旨又云有假者  
反之雖違其時以從其症蓋胃傷則嘔吐脾傷則泄瀉脾胃  
俱傷則吐瀉並作前症若傷辛熱停滯嘔吐或大便下痢者  
用六君子加黃連吳茱萸木香若停滯已去泄瀉不已用四  
君子加肉寇骨脂若傷生冷腹痛瀉痢青白用六君子加砂  
仁木香炮薑若傷魚肉等物用六君子加山查砂仁若瀉紅  
黃赤黑諸臟皆熱也先用香連丸後用補中益氣湯送香連  
丸若瀉痢青白乳食不化者用人參理中丸若吐瀉昏睡而  
露睛者用五味異功散睡而不露睛者用玉露散若吐而手  
足俱熱或喜冷飲食或睡不露睛者用瀉黃散或手足冷或

惡冷飲食或睡而露睛者用六君子木香然木香黃連一丸  
雖能攻剋病邪不無傷損脾胃治者審之

五太尉患吐瀉米穀不化時六月或用温補之藥更加嘔吐此  
熱傷胃也當用石膏湯解之不信又服丁香散師曰三日外必  
腹滿身熱飲水吐逆果如所言遂用白虎湯三服後以白餅子  
下之又與白虎石膏二湯各一服而愈

七太尉七月病吐瀉不食昏睡覺而悶亂噎氣乾嘔不渴衆作  
驚治師以爲脾虛先用史君子丸以補脾後用石膏湯以退熱

次日以水銀硫黃末一字薑水調下間用温補脾胃而愈  
馮承務子五歲吐瀉壯熱不思飲食目睛多白面色無神師曰  
此腎經虛弱下之則愈虛遂以消積丸磨之漸愈大凡傷食不  
下則成癖下後卽與補脾無不效者

愚治一小兒白睛多唇色白七月間停食吐瀉困睡驚悸久  
治不愈余曰驚悸心血虛怯也困睡脾氣虛弱也乃因稟賦  
不足所致耳用補中益氣湯及六味丸加鹿茸治之而愈  
一小兒盛暑吐瀉米穀不化或用黃連香薷飲之致腹脹作  
痛手足並冷此脾氣虛而伏陰在內也用五味異功散加水  
香治之而愈先君嘗云凡暑令吐瀉手足發熱作渴飲少者  
屬陽症宜清涼之劑若手足並冷作渴飲湯者屬陰症宜虛  
補之劑故大人屬陰者誤用寒涼之藥死後手足青黯甚則  
遍身皆然於此可驗

若吐乳瀉黃傷熱乳也吐乳瀉青傷冷乳也皆當下之吐瀉昏  
倦睡不露睛者胃實熱也吐痰涎及綠水者腎虛冷也  
薛按前症若兒自受驚或乳母恚怒致兒吐瀉青色者宜用

異功散加柴胡若母食厚味而乳熱者用東垣清胃散母飲  
酒而乳熱者用葛花解醒湯子服一二匙若飲燒酒而乳熱  
或子母身赤或昏憤服冷米醋三五杯多亦無妨兒服一二  
匙若母停滯生冷而乳冷者母服養胃湯子服調中丸若母  
停滯而變熱乳者母服大安丸子服五味異功散若母鬱怒  
傷肝脾而乳熱者用歸脾湯逍遙散若母脾虛血弱而乳熱  
者用六君子加芎歸若母氣血虛而乳熱者子母俱服八珍  
散若母勞役發熱而乳熱者子母俱服補中益氣湯若因怒  
動肝火而乳熱者用五味異功散加柴胡山枝其吐痰涎及  
白綠水者肝木乘脾土之虛寒症也用六君子加柴胡木香  
六凡吐乳瀉青色者屬驚法當平肝補脾吐瀉青白色者屬  
寒法當溫脾土前諸症若手足指熱者屬實手足指冷者

屬虛此亦驗法也

愚治一小兒每飲食失節或外驚所忤卽吐瀉發搐服鎮驚化痰等藥而愈後發搐益甚飲食不進雖參朮之劑到口卽嘔余用白朮和土炒黃用米泔煎數沸不時灌半匙仍嘔次日灌之微嘔再日灌之欲嘔此後每服二三匙漸加至半杯不嘔乃濃煎服而愈

一小兒停食吐瀉後身熱作渴瀉下紅白或青黑服黃連丸之類將愈而復熱手足指却冷余謂始爲實熱終爲虛寒用補中益氣湯加木香肉果治之而愈

一小兒傷食吐瀉不已瀉色青綠或溏白睡而露睛手足指冷額黑唇青余謂瀉痢青綠肝勝脾土也或時溏白脾土虛寒也額黑唇青寒水侮土也悉屬中氣虛寒用五味異功散

加升麻柴胡木香附子一劑而愈

一小兒傷食嘔吐發熱面赤服消導之劑飲食已消熱未全退余以爲胃經虛熱用六君子加升麻柴胡各二分四劑而愈小小兒目睛緩視大便臭穢乃飲交感時乳所致用四君子加木香藿香而安

一小兒吐酸乳食用四君吳茱黃連木香補脾平肝而愈後口中有酸水仍用前藥隨愈後吐苦水口中味苦用龍胆湯清肝火佐以四君子以補脾土乃瘥

一小兒唾黃水或口甘所食之物悉皆甘味用瀉黃散愈後停乳食服尅伐之藥口甘不食形氣殊弱用補中益氣湯而愈初生十日內吐瀉壯熱不乳或乳不消或白色先用白餅子下之後用益黃散和之

初生下吐因穢惡下咽故也用木瓜散主之凡初生急須拭淨口中否則啼聲一發穢物嚥下致生諸病

薛按芽兒初生之患多因乳母不慎七情不節厚味傳兒爲病當審其因以調治其母前所用之藥恐臟腑脆嫩不能勝受治者審之

咳嗽兼變症治

附喘嗽治驗

夫嗽者肺感微寒之症也八九月間肺氣大旺咳嗽而赤痰盛身熱當以葶藶丸下之若久病不可下也○十一月十二月嗽者乃傷風嗽也風從背脊第三椎肺俞穴而人當以麻黃湯汗之有熱症面赤飲水咽喉不利者兼用甘桔湯下之○若五七月間身熱甚唾粘者以偏銀丸下之若無熱症而但嗽者以葶藶丸主之後用化痰藥○咳而後喘面腫者肺火盛也用瀉白

散瀉之○咳而哽氣喉中有聲或嗽久肺亡津液者皆肺虛也並用阿膠散補之痰盛者先實脾土後用偏銀丸微下涎退即補肺○嗽而吐青綠水者百祥丸下之嗽而吐痰涎乳食者白餅子下之嗽而咯膿血者甘桔湯主之嗽而痰實面赤飲水者偏銀丸下之治初嗽下之久則補之更量虛實以意增損

薛按前症或兒自因腠理不密外邪內蘊或因乳母七情厚味鬱熱若風邪外傷者用麻黃湯表散鬱熱內蘊者用葶藶丸疏導鼻流清涕或頭痛聲重者用參蘓飲散之更用四君子以固肺氣若心火刑肺用人參平肺散以清肺金用六味地黃丸以滋腎水若嗽而吐青綠水者用六君子加柴胡桔梗平肝補脾若嗽而吐痰乳者用六君子加桔梗補土生金若嗽而吐膿血者用桔梗湯排膿理肺潔古先生云嗽而兩

腸痛肝火侮肺也用小柴胡湯嗽而嘔苦水膽汁溢上也用黃芩半夏生薑湯嗽而喉中作梗心火刑金也用甘桔湯嗽而下氣小腸失約也用芍藥甘草湯嗽而喘急風邪傷肺也用麻黃湯嗽而嘔長蟲胃氣虛也用烏梅丸嗽而痰涎壅盛風傷脾也用升麻湯嗽而遺尿大腸氣虛也用赤石脂禹餘糧湯不止猪苓湯嗽而腰背痠痛甚則咳涎風邪傷腎也用麻黃附子細辛湯嗽而遺尿膀胱氣虛也用茯苓甘草湯嗽而腹滿面腫不食脾虛氣逆也用五味異功散丹溪先生云土半日嗽者胃中有火也黃昏嗽者脾肺氣虛也午後嗽者腎中陰火也大抵咳嗽之症多因肺氣虛腠理不密外邪所乘若風中於衛則呼氣不出熱至於榮則吸氣不入風熱相搏血氣稽留於肺若寸口脈數而虛為肺痿脈數而實為肺疽

此因汗下過度重亡津液所致其麻黃湯乃發汗解表之劑葶藶丸乃內疎通利之劑白餅子亦疎利之劑審有是症方可暫用之苟泛投於治重亡津液必至敗症

杜氏子五歲仲冬咳嗽吐痰此風寒傷肺也用麻黃丸以瀉肺後用阿膠散以實肺如此者三其病愈虛師曰瀉肝而肝病不退補肺而肺病猶存無能為矣果大喘而歿

李運使孫八歲咳嗽胸滿短氣或謂肺經有熱用竹葉湯牛黃膏各二服三日加喘師曰此肺氣虛而寒邪所乘用補脾肺之藥而愈蓋竹葉牛黃治心藥也用以治肺誤矣

張氏孫九歲喘嗽悶亂飲水不止食不能下或用涼藥月許無效師曰此涼藥寒胃也以益胃散補脾土以瀉白散瀉金而愈段齋郎子四歲病嗽身熱吐痰數日咯血或用甘桔湯防已丸

其涎上攻吐喘不止用漏銀丸一服下之復以補肺散治之或曰症屬肺虛何以下師曰肺經咯血而有熱故也况痰實上攻亦使發搖故宜先下其痰隨補脾肺而愈

愚治一小兒停食服尅伐之藥唾痰腥氣面赤氣喘此復傷肺氣內亾津液而變肺癰也不信已而果唾膿用桔梗湯痰膿頓止其喘益甚余謂因脾虛不能生肺而然也用五味異功散加杏仁薏苡仁百合治之而愈後小便澁滯誤服八正散二劑小便愈澁咳嗽唾痰面赤盜汗此前藥復損腎氣虛火爍肺而為患耳余用五味異功散調補脾土用地黃丸滋養腎水而痊

愚治一小兒感冒咳嗽發散過度喘促不食痰中不用桔梗湯愈後因元氣未復大便似痢或用五苓散黃連枳實之

類痰喘目劄四肢抽搐變慢脾風而歿

一小兒傷風咳嗽發熱服解表之劑加喘促出汗余以為脾肺氣虛欲用補中益氣湯加五味子補之不信乃服二陳桑杏枳殼桔梗前症益甚又加發搐痰湧余仍用前藥更加鈞藤鈎而痊

一小兒母有哮喘因勞即發兒飲其乳亦嗽用六君子加桔梗桑杏治其母子常服數滴而愈大凡乳下嬰兒有疾必調治其母為善

一小兒傷食發熱抽搐嘔吐氣喘痰嗽屬脾肺氣虛而有熱以六君子加炒黑黃連山梔各二分一劑而安

一小兒咳嗽因其母素食膏粱炙煇所致用東垣清胃散而愈後其母因怒咳嗽脇痛其子亦然母服小柴胡湯其子愈

一小兒傷風咳嗽或行表散化痰反加痰盛肚腹膨脹面色  
眇白余謂此因脾肺氣虛而復傷用六君子加桔梗一劑頓  
愈三日後仍嗽鼻流清涕此復傷風寒而作仍用前藥加桑  
皮杏仁而愈

一小兒咳嗽痰涎上湧服清氣化痰藥反五更痰嗽余以為  
脾虛食積為痰也用六君子加神曲山楂枳椇而愈若因痰  
積而咳嗽者但健脾胃消食其痰化若用剋滯之劑中氣愈虛  
其痰愈盛

一小兒喘嗽胸腹膨脹泄瀉不食此因飲食傷脾而不能生  
肺也用六君子湯一劑而愈

一小兒痰涎上湧則咳嗽面色黃白服清肺之藥不應服下  
痰之藥益甚余曰面色痿黃乃脾虛不能化食而為痰也令  
節飲食用六君子湯而痊大抵因嗽而生痰者當治其肺因  
痰而致嗽者當理其脾

薛氏醫按 小兒直訣卷之三

錢氏小兒直訣三卷

薛氏醫按

宋錢仲陽著 閻孝忠集

明薛 已註 吳中珩校

五臟內外疳症主治

凡小兒疳在內目腫腹脹瀉痢青白體漸瘦弱疳在外鼻下赤爛頰揉鼻耳或肢體生瘡鼻瘡用蘭香散諸瘡用白粉散 肝疳一名筋疳白膜遮睛或瀉血而瘦用地黃丸 心疳面黃頰赤身體壯熱用安神丸 脾疳一名肥疳體黃瘦削皮膚乾澀而有瘡疥腹大嗜土用益黃散 腎疳一名骨疳肢體瘦削遍生瘡疥喜臥濕地用地黃丸 肺疳一名氣疳喘嗽氣促口鼻生瘡用益黃散 若患潮熱當先補肝後瀉心若妄以硝黃諸藥利之若患癖當消磨若誤以巴豆礪砂下之又傷寒悞下皆

薛氏醫按

小兒直訣卷之三

洪三九



能成疔其初病者為熱疔用黃連丸久病者為冷疔用木香丸  
冷熱相兼者用如聖丸津液短少者用白朮散凡此因大病脾  
胃虧損內亾津液所致當固脾胃為主而早為施治則不變敗  
症也

薛按疔症或哺食大早或嗜食甘肥或服峻厲之藥重亾津  
液虛火熾盛或因烹飪或乳母厚味七情致之各當調治其  
內○若口舌蝕爛身體壯熱顯唇赤色或作腫痛腹膈煩悶  
或掌熱咽乾作渴飲水便赤盜汗醫醫虛驚此心經內外疔  
也用安神丸之類主之○若鼻外生瘡眼目赤爛肢體似癰  
兩耳前後項側缺盆兩腋結核或小腹內股玉莖陰囊辜丸  
腫潰小便不調或出白津或咬指甲搖頭側目白膜遮睛羞  
明畏日壯大清筋口乾下血此肝經內外疔也用地黃丸

二九主之○若頭不生髮或生瘡痂或髮成穗或人中口吻  
赤爛腹痛吐逆乳食不化口乾嗜土瀉下酸臭小便白濁或  
合目昏睡惡聞木音此脾經內外疔也用肥兒丸主之○若  
鼻外生瘡咽喉不利頸腫齒痛咳嗽寒熱皮膚皴錯欠伸少  
氣鼻痒出涕衄血目黃小便頻數此肝經內外疔也用地黃  
清肺飲主之○若腦熱吐痰手足逆冷寒熱往來滑泄肚痛  
口臭作渴齒齲潰爛爪黑面蠟身耳生瘡或耳出水或食自  
髮此腎經內外疔也用地黃丸主之凡疔熱上攻或痘毒上  
升為患甚速名為走馬疔急敷雄黃散服蟾蜍丸輕則牙齦  
腐爛唇吻腫痛可治重則牙齦蝕落腮頰透爛不治世傳方  
又云有  
無辜等疔一十二症補註蟾蜍丸下

愚治陳職方孫面頰患瘡將蝕兩目或用清熱之藥久而不

愈余用大蕪蕪湯二劑清其肝火而愈

陳司臆子遍身生瘡色痿黃腹脹內熱大便不調飲食少思倦怠口乾用大蘆薈丸治其肝脾不月而愈

俞廷評子目劓面青食少體倦大便滑泄此木乘脾土用芍藥參苓飲而痊

陳工部孫腹內一塊小便不調或以血痞久服行氣破血等藥發熱口乾體瘦懶食幾成瘵症余謂面黃兼青乃肝脾疴症用補中益氣湯煎送大蘆薈丸四服又用前湯加車前子煎送六味丸四服又用清肝生血之藥而愈

一女子十二歲目生白翳面黃浮腫口乾便澁此肝脾之症用四味龍兒丸而痊

一小兒九歲目劓畏明年深不愈或以爲實火服瀉青丸之

類益甚求治於余仍用瀉肝余謂肝經虛火用地黃丸補之而愈夫肝氣爲陽爲火肝血爲陰爲水肝經之症若非肝火血燥而生風必因肝血虛而火動其初患而病氣形氣俱實者宜少與瀉青丸瀉之其久患而病氣形氣俱虛者當與地黃丸補其腎肝蓋此症原因肝經血少而生風耳不可輒用瀉青峻劑經云凡病虛則補其母實則瀉其子前症果肝經實熱宜用柴胡黃連之類以治心火者審焉

一小兒鼻外生瘡不時揉擦延及兩耳又一小兒視物不明鼻內或痒或生瘡用四味肥兒丸漸愈

一小兒耳內出水耳外生瘡膿水淋漓經歲不愈余用九味蘆薈丸以治肝用地黃丸以生腎水乃瘥

一小兒遍身如瘡或痒或痛肌體消瘦日夜發熱口乾作渴

大便不調年餘不愈用蘆薈丸以治肝兼五味異功散以補脾而愈

一小兒數歲腦後並結二核肉色如故而不覺腫正屬膀胱經觀其形狀審其糞色兼屬肝脾腎三經用九味蘆薈丸以清肝脾佐用地黃丸以補腎水形體漸健不兩月而消

一小兒腹內結塊小便不調余以為肝經內疳症用蘆薈丸為主佐以龍膽瀉肝湯而消

一小兒自脫胎即兩目赤腫或作痒或作翳此胎稟肝火耳用六味蘆薈丸二丸而愈

一小兒患瘰癧小便頻數兩目連劄或作嘔少食泄瀉後重此肝經熱盛而脾土受邪也用補中益氣湯六味地黃丸瘰癧一小兒面色痿黃眼胞微腫作渴腹脹飲食少思腹中一塊

或移動小便澄白大便不實此脾疳之患用四君子加山梔蕪荑兼四味肥兒丸而愈

一小兒嗜食泥土困睡泄瀉通身如疥此脾經內外疳也用六君子湯及四味肥兒丸而痊

一小兒面黃頰赤發熱作渴睡中驚悸此心經內疳症用四君子加炒黑黃連芎歸為主佐以秘旨安神丸而痊

一小兒所患同前兼掌心發熱遍身如疥此心經內外疳症用肥兒丸為主佐以秘旨安神丸而愈

一小兒咳嗽寒熱咽喉不利鼻上有瘡久不生痂此脾經疳症用地黃清肺飲四味肥兒丸而愈

一小兒下疳潰爛瓜黑面皴遍身生疥此腎經內外疳症用地黃丸為主佐以四味肥兒丸而痊

史少參幼子二歲頂後結核不時仰首或以爲熱瘡內潰用  
針決之服消毒之藥後曲腰啼哭余謂此無辜外吊症也曲  
腰而啼內吊症也果歿

腹痛腫脹諸症

小兒腹痛體瘦面色脫白目無睛光口中氣冷不思飲食或嘔  
利撮口此脾土虛而寒水所侮也用益黃散調中丸主之若口  
中氣溫面色黃白目無睛光或多睡惡食或大便酸臭此積痛  
也用消積丸甚者白餅子下之後以白朮散調補胃氣若腹脹  
而悶亂喘滿者實也用紫霜丸白餅子若不悶亂喘滿者脾虛  
也誤下之以致目胞肥面四肢浮腫肚腹愈脹以塌氣丸主之  
因下而喘脾氣益虛脾虛不能勝腎水隨肺氣行於四肢如  
水狀若侵浮於肺則大喘也

薛按腹痛不食口中氣冷下利撮口等症屬形病虛寒也用  
六君子加炮薑溫補之食積多睡口中氣溫惡食面黃白等  
症屬病氣實而元氣虛也用六君子加神曲山查消導之劑  
若腹脹喘滿脾肺虛而氣不歸源者用補中益氣湯若因不  
脾肺氣虛而面目四肢浮腫等症者用金匱加減腎氣丸况  
此症有因乳母脾胃宿積飲食傷脾所致其白餅子紫霜丸  
必形病俱實方可用也塌氣丸亦非調補之劑宜審用之  
愚治一小兒每停食腹痛發赤暈用清中解鬱湯而愈後患  
搖頭咬牙痰盛發搐吐酸腐待其吐盡翌日少以七味白朮  
散次日又以參苓白朮散調理脾胃遂不復患大抵吐後兒  
安不必更服他藥恐復傷元氣也

一小兒傷食腹脹嘔吐發熱面赤服消導清熱之劑飲食已

消熱赤未退用六君子加升麻柴胡各二分升補胃氣而愈  
一小兒五歲停食腹痛發熱面赤或用養胃湯枳實黃連更  
加腹脹午後熱甚按其腹不痛余以為脾虛而藥傷用六君  
子湯數劑而痊

一小兒數歲每停食輒服峻厲之藥後肚腹膨脹嘔吐泄瀉  
先用六君子湯諸症漸愈又用補中益氣湯而安

一小兒肚腹脹飲食即瀉手足逆冷此脾氣虛寒也先用參  
理中丸後用六君子湯而愈

一小兒傷食腹脹胸滿有痰用異功散而痊後服傷食腹脹  
兼痛或用下劑痛雖止而脹益甚更加氣喘此脾益傷而肺  
益虛也用六君子湯加桔梗調補而愈

一小兒腹脹惡食發熱惡心殊類外感余曰此飲食所傷脾

肺虛熱也用保和丸一服諸症頓退但腹仍脹用異功散

一小兒傷食腹脹服剋伐之劑小便濇滯又服五苓散之類

飲食漸減小便不通四肢頓腫余朝用金匱加減腎氣丸夕  
用異功散而愈

若腎熱傳於膀胱熱甚逆於脾肺脾胃虛而不能制腎水流走  
四肢而身面皆腫若上勝則刑於肺故令喘也

薛按肺主氣腎主水前症因稟賦不足或因大病後或嘔行  
汗下致脾虛不能制水而溢皮膚肺虛不能攝氣而氣上逆  
宜用六味丸補中益氣湯治之如小便利用金匱加減腎  
氣丸腎經虛火上炎肺熱作喘者用六味地黃丸心火熾盛  
肺熱作喘者用人參平肺散凡此皆屬腎經陰虛熱症用六  
味丸壯水為主若用清熱分利之藥則誤矣

一小兒稟父腎熱小便赤澀服五苓散之類後患停食服尅  
伐之藥四肢面目浮腫小便不利漸至氣喘此誤行滲利脾  
肺氣虛不能攝水而患腫脾腎虛寒不能制水而氣喘用六  
味丸加牛膝車前及補中益氣湯而愈  
若口吐痰沫或吐清水面脫白心腹痛而有時者蟲痛也與癩  
相似但目不斜手不搐也用安蟲散主之

薛按蟲乃濕熱所生或木氣而化有因臟腑虛弱有因胃冷  
胃熱為人身之固有者其為患往來攻痛或吐涎水肌體消  
瘦面無正色但當調補脾胃為主若蟲食上部則上唇有白  
點蟲食下部則下唇有白點腹中之蟲朔日之後其頭向上  
望日之後其頭向下如或用藥先以肉物近兒烹炙使聞香  
味蟲頭皆向上則藥易於奏效丹溪先生云冬月吐蟲多是

胃氣虛寒用錢氏白朮散加下者二粒補之可見小兒之蟲  
皆飲食傷脾所致患瘡疥肉生蟲虱者皆肝木所主也

辛氏子年五歲病蟲痛或用巴豆礪砂之類哭而俛仰按腹大  
叫面青黃而時白目仍青師曰此病大困更加瀉則不救次夜  
大瀉并下前藥師曰今面青作瀉此肝木乘脾形病相反當五  
日篤七日死已而果然

愚治一小兒蟲動心腹痛先服蕪荑散下之更加作嘔食少  
口渴飲湯右顛鼻準白中兼黃此脾肺氣虛也余用異功散  
二服少愈仍加炮薑一服而安

一女子年十三歲面色青黃頭左生癰頸項結核寒熱往來  
大便不利余謂此肝木侮脾元氣虧損所致寒熱非客邪便  
秘非內實不信仍服雜藥後作泄瀉癰次出風余用六君子

加升麻柴胡蕪荑為主佐以九味蘆薈丸諸症悉退頸核消  
一小兒面色青黃心腹作痛時欲嘔吐或小便淋漓或陰莖  
濕痒余以為肝經風熱侮脾不信後遍身生疥出蟲虱余用  
四味肥兒丸六君子湯之類尋愈

若腹中有癖不食但飲乳是也當漸用白餅子下之蓋小兒病  
此良由乳食不消伏於腹中乍冷乍熱飲水過多即蕩滌腸胃  
亾失津液脾胃虛弱不能傳化水穀以致四肢羸瘦肚腹漸大而成疳矣  
薛按前症或因小兒乳食過多致傷脾胃或乳食起居七情  
六淫失宜所致必先調補元氣為主佐以消散之劑若除之  
不以漸則必有顛覆之患常治食積既去而熱不退或作嘔  
吐少食用五味異功散脇脹少食善怒瀉青用六君子湯加  
升麻柴胡少食體倦瀉黃用補中益氣湯手足冷加炮薑木

香如不應佐用四神丸體瘦潮熱口乾大便不調用肥兒丸  
若兼頸項結核口齒腐爛當參前疳條主之

愚治一小兒腹中痞塞恪服二陳枳實黃連其痞益甚余謂  
屬脾經血虛用六君子加當歸數劑胃氣漸服復乃朝用異  
功散加升麻夕用異功散加當歸而愈

一小兒素嗜肉食腹中作痛大便不調半載之後肚腹膨脹  
右脇內結一塊不時轉移又三月左脇內亦結一塊胸腹亦  
脹齟潰作渴小便赤澀或澄白大便色穢不一又半載領下  
結核三五枚服消塊行滯等藥元氣益虛其塊益甚余用四  
味肥兒丸五味異功散之類隨症進退治之熱渴漸止又月  
餘腹脹漸消更佐以九味蘆薈丸齒齟漸愈乃用四君子為  
主佐以蕪荑丸之類而痊

一小兒飲食不節或作瀉或腹痛或腹脹腹中一塊大便不調作渴發 齕爛口臭專服消導剋滯前症益甚形體益瘦余曰面色黃中隱青脾土虧損而肝木所侮也法當調補中氣平肝木則脾氣自旺虛火自退諸症自愈遂用冲和湯及大蕪荑湯之類果愈

一小兒患痞服剋滯之藥余謂形氣有餘病氣有餘者當瀉不當補形氣不足病氣不足者當補不當瀉前症屬形病俱虛非調補中氣不愈不信仍行剋伐元氣虧損虛火上炎齒齕蝕爛頷下結核余用大蕪荑湯及異功散之類尋愈

### 五臟雜症主治

喜汗者厚衣卧而額汗出也盜汗者肌肉虛而睡中汗出也用止汗散遍身汗用香瓜丸○胃虛汗者上至頂下至臍也用益

### 黃散六陽虛汗者上至頭下至項難治

薛按前症因小兒元氣未充腠理不密或因飲食停滯鬱熱或厚衣溫暖臟腑生熱而津液妄泄也其喜汗屬心經血熱用導赤散血虛用團參湯其盜汗屬腎經虛熱用五味異功散氣血虛弱用人參養榮湯若寒水侮土用益黃散設泛行施治誤損脾胃多成疳瘵其六陽虛汗乃稟賦不足若用參附芪附二湯亦有生者大凡汗多亡陽必至角弓反張頸項勁強若用十全大補之劑多有生者

張氏三子大者汗出遍身與香瓜丸次者上至頂下至胸與益脾散小者但額有汗與石膏湯各五日而愈若槩用麥煎散治之誤矣愚治一小兒其面色或白或青或惡寒或發熱鼻間微黃兼白盜汗自汗胸膈不利飲食少思常懷畏懼余以為脾肺氣



虛不信又用硃砂安神之類前症益甚更往來寒熱泄瀉不食余用六君子湯加黃芪當歸為主佐以八珍湯之類而痊  
一小兒五歲腹痛泄瀉盜汗鼻間左顛皆白此屬脾肺氣虛而食積所致用六君子加山查神曲四劑腹痛頓止去二味又四劑而大便調用四君歸芪二劑而盜汗止

一小兒十二歲形氣瘦弱右顛白兩頰赤鼻間隱青盜汗久不愈此稟足三陰虛而然也朝用補中益氣湯夕用六味而愈  
一小兒三歲盜汗少食聞藥即嘔此胃傷也用浮麥炒為末每服少許以乳調服旬餘嘔止乳進佐以六君子湯而愈  
一小兒停食腹痛夜間盜汗此脾虛食積所致用六君子湯數劑腹痛漸愈盜汗亦止後復停食服消積丸作瀉不止白汗盜汗飲食甚少睡而露睛四肢發搐此脾土虛而肝木所

服用六君子少加柴胡治之飲食漸進諸症漸愈但盜汗不止屬腎虛佐以地黃丸愈

一小兒發熱呵欠頻悶咬牙盜汗屬肝膽火症用小柴胡湯加山梔二劑又用用地黃丸料煎服而愈

夜啼者小兒筋骨血脉未成而多哭脾臟冷而痛也當與溫中藥或花火膏主之 若虛怯為冷所乘則唇青

薛按前症多因小兒稟賦不足或乳母飲食七情虧損所致若面赤白及白睛多者屬腎氣不足至夜則陰盛而腹痛也用六味丸若臉青唇白或小便黃短屬脾氣不足至六則陰虛或加辰砂如不應屬腎火用地黃丸唇色青白口中氣冷或肢體冷或泄瀉曲腰或泄瀉不乳此脾腎虛弱用六

神效兼嘔吐用六君子湯大便不化乳少腹脹用五味異功散加漏蘆令母服之兒病自愈兒亦服四五滴尤妙兒大數滴思治一小兒停食腹痛夜啼用大安丸而愈後乳食雖入其腹仍痛用六君子加山查神曲痛少止乃去二味又四錢痛一週歲兒痰嗽啼哭或用抱龍丸未止余視其右顛白左顛青此肺肝二經相勝先用瀉白散以祛肺邪次用柴胡梔子散以平肝火又用地黃丸以滋腎水而痊

一小兒三歲夜啼面色白黑睛少小便清此脾腎氣虛朝用補中益氣湯加山藥五味子夕用地黃丸頓愈

驚啼者邪氣乘心也當以安神主之

思按哭而不啼多泪是驚悸也啼而無泪是痛也若因心血不足用秘旨安神丸心火熾盛用導赤散木火相搏用柴胡

梔子散肝血不足用六味丸所云十啼者蓋亦大同小異耳愚治一小兒白睛多面色赤時作啼此稟腎不足用地黃丸半載後忤其意雖哭面色不赤丹溪先生云小兒忽大叫必死卽此義也

若浴後拭臍不乾風入作瘡令兒撮口甚者脾虛也若頻撮口是氣不和也益黃散主之

愚按前症果因浴後拭挹不乾用柏礬爲末搽之卽愈若兼乳母肝脾有熱助兒爲患當用加味逍遙散以治其母若風入作瘡邪傳於脾撮口者其害匪輕七日內患者其危尤速弄熱舌者脾臟徵熱令舌絡牽緊時時舒熱當少用瀉黃散或飲水者脾胃虛而津液少也兼面黃肌瘦五心煩熱者疳瘦也用胡黃連丸大病未已而弄舌者凶

愚按小兒舌微露而即收名弄舌屬心脾虧損用溫脾散補之舌舒長而收緩名吐舌乃心脾積熱少用瀉黃散主之兼口舌生瘡作渴飲冷屬腎經實熱用瀉黃散作渴畏冷屬胃經虛熱用四君子湯食少作渴或大便不實脾胃虛弱也用七味白朮散口角流涎或顛顛患腫胃虛風熱也先用人參安胃散後用七味白朮散若午後甚者脾血虛也四物湯多加參木茯苓未應用補中益氣湯及審相勝其疳瘦症當參諸疳門七味白朮散即人參白朮散

解顛者生下顛門不合也長必多愁少笑目白睛多面色恍白肢體消瘦皆腎虛也

愚按腎主髓腦為髓之海前症因父母精血不足不能榮養宜用地黃丸補之有至七八歲或十四五歲氣血既盛而自合若縱恣食色慾戕賊真陰亦不能盡其壽矣此症若在乳下當兼補其母更以軟帛繫束兒首使其易合亦有顛陷顛填俱屬稟不足或五疳久病元氣虧損者仍參後小便不遺類主之

愚治一小兒顛解足軟膝大不能行履用六味丸加鹿茸治之三月而能步履

一小兒年十四歲而近女色發熱吐痰至有室兩目羞明頭角脹大仍不斷慾頭漸大顛門忽開用地黃丸益氣湯之類斷色慾年餘而愈

一小兒十三歲患前症內熱晡熱形體倦怠食少作渴余以為所稟怯用六味丸加鹿茸補之不越月而痊

一小兒十四歲解顛自覺頭大視物皆大畏日羞明先兄以

為末栗怯弱用六味丸加五味鹿茸及補中益氣加山藥山  
菜英半載漸愈二載而顯合後媿婚覺顙門開解足心如炙  
喜其斷色慾戒厚味日服前藥二劑三載而愈

胎肥者生下豐厚目睛粉紅大便乾難時出涎水○胎熱者生  
下有血色時叫哭身熱淡黃目睛多赤大便色黃急欲食乳並  
用浴體法主之○胎怯者生下面白肌肉瘦弱大便白水身無  
血色嘔氣多噦亦用浴體法

薛按浴體之法乃開發腠理疏泄陽氣者也其胎氣果熱在  
暑月然幾可用其或胎怯而用前法恐復傷真氣也然此症  
屬有餘者胎肥胎熱也因母食膏粱厚味或怒火鬱熱胎怯  
弱者因父精不足或母氣虛弱用八珍湯父精不足用地黃  
丸俱加漏蘆令母服之子亦服之

急欲乳不能食者此風邪由臍而蘊熱心脾致舌厚唇

燥不能  
吮乳也

薛按前症果因外邪而唇口撮緊者名為臍風多不能吮若  
心脾有熱舌尖痛不能吮乳舌本痛不能送乳者以柳華散  
敷之若舌下腫如小舌者或舌絡牽痛或齒齲患白星俱用  
線針刺出毒血亦敷前散若唇腫痛或裂紋作痛以當歸膏  
調前散敷之若暴病發熱作渴飲冷大便秘結用瀉黃散疎  
導其熱若病後發熱口渴飲湯大便不實用異功散調補胃  
氣若服攻伐之劑兼嘔吐或腹痛脾胃復傷也用四君子湯  
或口角流涎或痰氣壅盛脾不能攝也用六君子湯若兒自  
食甘肥或母食酒麪致兒口舌生瘡用清胃散以清熱若作  
嘔少食泄瀉用白朮散以補脾若手足並冷或腹痛惡寒用  
六君炮薑以溫中若因乳母飲食勞役失宜發熱致兒用補

中益氣湯因乳母肝脾二經血虛內熱傳兒用加味道遙散  
入珍湯因乳母肝脾鬱怒血傷內熱致兒為患用加味道遙  
散加味歸脾湯俱加漏蘆子亦服數滴仍參前弄舌類凡針  
以針直刺不可橫挑恐  
傷舌絡則言語不清

龜胸龜背者由兒生下風客於脊入於骨髓致成龜背若肺熱  
脹滿於胸膈膈即成龜背並用龜尿點其骨節自愈取尿法用  
青蓮葉安  
龜在上用鏡照之其尿自出

薛按小兒元氣未充腠理不密風邪乘之或痰飲蘊熱於肺  
風熱交攻而致或坐早風入骨髓治當調補脾肺為主若因  
乳母厚味辛辣而致者當兼治其母若因稟父肝腎虛熱者  
用六味地黄丸若稟腎氣不足者用八味地黄丸

若患吐瀉或大便後雖有聲而不能言又能嘔物者非失音此

腎怯不能上接於陽也當以地黄丸主之凡口噤不止則失音  
語遲

薛按前症多因稟腎不足蓋腎脉繫於舌本非地黄丸不能  
治故患此症者若仰首呵欠則嗽如未應須兼以補中益氣  
湯滋其化源若陰火上炎肺金受傷而失音者亦治以前法  
保嬰集云小兒五六歲腎氣不足而不能言者用菖蒲丸口  
噤不能言者用地黃丸

愚治一小兒言遲患泄瀉聲音不亮雜用清熱等劑聲音如  
瘖飲食少思去後多在侵晨朝用地黃丸加五味子夕用補  
中益氣湯其泄頓止却專服前丸不兩月其言漸亮而愈  
一小兒白睛多而黑睛少吐瀉後喉瘖口渴大便不實朝夕  
悉服地黃丸而痊後患瀉其喉復瘖仍服前丸遂愈

若大病後身目皆黃者黃病也○身痛背強大小便澀一身盡

黃小便黃赤此黃疸也瀉者難治。若百日或半年不因病而身黃者胃熱胎疸也若淡黃兼白者胃怯也

薛按大病後身目皆黃或肢體黃胖者脾氣虧損而真臟為病宜用六君子湯參苓白朮散調補元氣病後發渴者脾氣虛而津液少也用七味白朮散若脾經濕熱壅滯二便秘澀理不得疎泄而為患者名為黃疸用茵陳湯初生身黃壯熱不乳便秘此為胎熱用地黃湯若二便赤澀腹脹面赤飲水用茵陳湯調五苓散若清便自調四肢便冷用益黃散淡黃白用調中丸

愚治一小兒旬日內先兩目發黃漸及遍身用瀉黃散服之  
一小兒因母食麪飽脹噁酸而患遍身皆黃余以越鞠丸治其母以瀉黃散治其子並愈

長大不行行則腳軟。齒久不生則不固。髮久不生則不黑皆胎弱也

愚按前症即五遲之症也若腎主骨齒者骨之餘髮者腎之榮也良由父母精血不足腎氣虛弱不能榮養而然耳有肝腎虛長而不能行者有肝氣虛而手足拳攣者有肝腎虛而脚不能舒展者並用地黃丸滋補之有心氣虛而不能言語用玄參湯補中益氣湯培養之若久病或五疳所致者但調補脾胃為王全嬰方云頭項手足身軟謂之五軟症皆胎稟腎氣怯弱也

愚治一小兒體瘦腿細不能行步齒不堅固髮稀短少屬足三陰虛用六味地黃丸補中益氣年餘諸症悉愈形體充實  
一小兒三歲言步未能牙髮稀少體瘦骨立發熱作渴目黑

睛少服肥兒丸不應此腎虛疳症也前丸乃脾胃經之藥久服則腎益虛而疳益甚不信果牙髮漸落用六味丸加鹿茸五味子半載而愈  
一小兒七歲左腿細短寸許不良於行目睛白多或有盜汗髮黃成穗用地黃丸加鹿茸五味子為主佐以補中益氣湯半載行履如故  
一小兒脫肛半載恪服升補元氣之藥而愈

錢氏小兒直訣四卷

薛氏醫按

宋錢仲陽著

闕孝忠集

明薛 巳註

魏一元校

瀉青丸 治肝經實熱急驚搐搦

羌活 按用羌活者壬乙同歸一治也

大黃 瀉諸實熱

川芎 入手足厥陰辛以緩肝

山梔仁 瀉心火實則瀉其子也

龍膽草 炒益肝胆氣止驚

當歸 入足厥陰以其用藏血也

防風 各等分

右為末煉密丸芡實大每服半丸煎竹葉湯入砂糖化下  
薛按前方足厥陰肝經解散肌邪踈通內臟之苦寒藥也若大便秘結煩渴飲冷飲食如常屬形病俱實宜用此瀉之若大病調和煩渴飲冷屬病氣實而形氣虛宜用抑青丸平之

若大便不實作渴飲湯飲食少思肢體倦怠屬形病俱虛宜  
用地黃丸補之若肝經血虛生風先用四物湯加鈎藤鈎以  
生肝血繼用四君子湯以補脾土若因肝經血燥生痰用地  
黃丸生腎水益肝血若土不能培木用四君子湯加當歸以  
補中用地黃丸以滋腎若因肺金剋肝木用六君湯加芍藥  
木香實脾土以平肺金若因心虛奪母之氣或腎水虛不能  
生肝木者並用地黃丸主之若屢服峻劑而脾胃虛寒者必  
用六君子湯加丁香木香補脾胃以培陽氣若因乳母恚怒  
肝火妄動致兒為患者毋服加味小柴胡湯若因乳母肝脾  
血虛發熱致兒為患者毋服加味道遙散子亦服數滴

柳青丸即前方去山梔大黃

柳肝散 治肝經虛熱發搐或發熱咬牙或驚悸寒熱或木乘

土而嘔吐痰涎腹膨少食睡卧不安者

軟柴胡 五分入手足少陽厥陰行經藥也 東垣云瀉肝

川芎 入分 當歸 白朮 炒 茯苓 保心

鈎藤鈎 各一錢主寒熱十一驚 甘草 五分

右水煎子母同服

瀉心湯 治心經實熱

黃連

右為末每服五分臨卧溫水化下

薛按前症若叫哭發熱作渴飲水抽搐有力仰面而睡者屬  
心經實熱宜用瀉心湯或導赤散若發熱飲湯抽搐乏力驚  
竄咬牙合面而睡者屬心經虛熱用補心散若喘嗽面赤壯  
熱飲水肺乘心也用瀉白散若頭搖目劓身熱抽搐肝乘心



也用柴胡清肝散若合目昏睡泄瀉身熱脾乘心也用瀉黃散若鼠視驚悸咬牙足熱腎乘心也用安神丸若因乳母致症亦用前藥以治其母

導赤散 治小腸實熱小便秘赤

生地黄 心與小腸之藥 七通利小腸之熱故錢氏用以導赤也

甘草 各等分生用瀉心火

右為末每服一錢入淡竹葉涼心水煎

薛按瀉心湯導赤散瀉心小腸實火之劑蓋心為脾母脾為心子然心既病則脾土益虛矣用者審之 味此說當補脾土

生犀散 治心經虛熱

地骨皮 赤芍藥 柴胡

甘草 五錢

犀角 二錢

錢鎊主風熱驚癇鎮肝除心熱丹犀角症後用以散餘毒若無毒而

乾葛 各一兩

血虛者或已躁熱發散者而誤用之禍立至

右為末每服一二錢水煎

薛按前方云治心經虛熱然其所用多屬瀉心瀉肝脾之劑蓋虛熱二字恐傳寫之誤假如心經自病而血虛熱者用秘旨安神丸脾虛奪心之氣而熱者用秘旨補脾湯肝木不能生心火而虛熱者用地黃丸

秘旨安神丸 一治心血虛而睡中驚悸或受驚嚇而作

人參 補五臟 半夏 湯泡燥脾 酸棗仁 炒寧心

茯神 各一錢 當歸 酒洗 橘紅

赤芍藥 各七分 五味子 五粒 甘草 各三分

右為末姜汁糊丸茨實大每服 丸生姜湯下

瀉黃散 治脾胃實熱

小兒直訣卷之四

三

洪五

藿香葉

入手足太陰經助脾胃止嘔

甘草各七錢五分

石膏五錢湯

山梔仁

一兩治胃中熱氣

防風二兩

右用蜜酒微炒為末每服一二錢水煎

薛按前症若作渴飲冷即不露睛手足熱甚或遍身發黃屬胃經實熱宜用瀉黃散若作渴飲湯卧而露睛手足並冷屬胃經虛熱宜用異功散若面青搐搦乳食少思肝乘脾也用秘旨補脾湯若面赤驚悸身熱昏睡心乘脾也用秘旨安神丸若面白喘嗽肢體倦怠肺乘脾也用補中益氣湯若唇黑泄瀉手足指冷腎乘脾也用益黃散病後津液不足口乾作渴宜用七味白朮散若乳母胃梁厚味七情鬱火所致當審其因而治其妨

五味異功散 治脾胃虛弱吐瀉不食

人參 茯苓 白朮 甘草炒 陳皮各等分

右為末每服三錢姜棗水煎

薛按前方補脾胃之聖藥也况人之一身以脾胃為主若小兒乳食失節寒涼失宜或乳母六淫七情失調兒飲其乳諸病頭起當專以此藥治之其應如響

益黃散 治脾土虛寒嘔吐泄瀉

陳皮 青皮下食入太陰之舍 丁香二錢去脾

訶子肉各五錢能開胃消食止痢 甘草炙二錢

右為末每服一二錢水煎

薛按前症若因脾土虛弱而吐瀉者用五味異功散若因肝木侮脾土而吐瀉者用六君子加柴胡如不應或手足指冷屬脾胃虛寒也更加木香炮薑若因乳母脾土虛而肝木侮

亦治以前藥若乳母鬱怒致兒患前症毋服加味歸脾湯  
人參安胃散 治因服峻劑脾胃虧損或成慢驚泄瀉嘔吐或  
腸胃有熱以致前症

人參 一錢

黃芪 二錢

生甘草

炙甘草 各五分

白芍藥 七分

白茯苓 四分

黃連 二分

右為末每服二三錢水煎

七味白朮散 治吐瀉或病後津液不足口乾作渴

人參

白朮

木香

白茯苓

甘草 炙

霍香葉 各一錢

乾葛 二錢

生津液陽明經藥也

右為末每服二三錢水煎

薛按胃傷則嘔脾傷則瀉故用前藥調補胃氣以化生津液  
不足者用四君子湯尤效

秘旨補脾湯

治久病面黃肌瘦咬牙目劓頭髮稀少誤服所

人參

白朮 各一錢

白芍藥 酒炒

白茯苓 各八分

陳皮

川芎 各六分

甘草 炙

黃芪 炙

當歸 酒洗各四分

右每服二三錢薑水煎

瀉白散 治肺經實熱咳嗽痰喘

桑根白皮

炒瀉肺氣少  
有餘者邪有餘也

地骨皮 各一兩

甘草 炙 五分

右為末每服一二錢入酒米百粒水煎

薛按活人方云喘者肺氣有餘也氣盛當認作氣衰有餘當  
認作不足肺氣盛者乃肺中之火盛也有餘者肺中之邪有  
餘也故用前藥以瀉之若土虛不能生肺用補中益氣湯火  
來剋金用人參平肺散腎水奪母之氣或陰火上炎用地黃

秘旨補脾湯

瀉白散

五

共五

丸若肺虛肝木乘侮先用阿膠散後用瀉青丸若因乳母肺經受症致兒為患母服前散若因乳母感冒風寒肺經鬱熱致兒為患用十味參蘇飲若因乳母膏粱醇酒積熱致兒為為用加味清胃散

阿膠散 治肺虛咳嗽口乾作渴

明阿膠 一兩 熬化 能補氣不足

甘草 錢一

馬兜鈴 五錢 土肺熱咳清肺補肺

杏仁 七個 去皮尖下 喘用治氣也

糯米 一兩

右為末每服二錢水煎

薛按前症若因脾胃弱而肺氣虛者宜用補中益氣湯若肺

金自虛者宜用四君子湯

地黃丸 治腎虛解顛或行遲語遲等症

山茱萸肉 補腎

乾山藥 各四錢 涼而能補

澤瀉 補陰入腎經

牡丹皮 涼腎瀉陰中之火治足少陰無汗之骨蒸

白茯苓 各三錢 入壬癸

右地黃芍藥餘為末加煉蜜丸桐子大每服二三十丸空下  
薛按前丸治腎經虛熱作渴小便淋秘痰氣上壅或肝經血虛燥熱風客淫氣而患癰癥結核或四肢發搐眼目瞶動或肺經虛火咳嗽吐血頭目眩暈或咽喉燥痛口舌瘡裂或心經血虛有火自汗盜汗便血諸血或脾虛濕熱下刑於腎腰膝不利或疥癬瘡毒等症並用前藥為主而佐以各臟之藥大抵此藥為天生水之劑若稟賦不足肢體瘦弱解顛失音或畏明下窺五遲五軟腎疝肝疝或早近女色精氣虧耗五臟齊損九諸虛不足之症皆用此以滋化源其功不能盡述

四君子湯

治脾氣虛弱飲食不化腸鳴泄瀉或嘔穢吐逆

人參 白茯苓 白米 甘草各五分

右水煎服 四物湯 治肝經血虛發熱日晡益甚或煩燥不寐

當歸 熟地黃各二錢 白芍藥一錢 川芎五分

右作二劑水煎服

八珍湯 治氣血俱虛或因失血過多或因剋伐元氣以致內

熱發熱肢體瘦瘠即四物四君子二湯合服

十全大補湯 治氣血虛熱或因病後惡寒發熱或自汗盜汗

食少體倦或發熱作渴頭暈眩運等症即八珍湯加黃芪桂

六君子湯 治脾胃虛弱體瘦面黃或久患瘧痢不思乳食或

嘔吐泄瀉飲食不化或時患飲食停滯或母有前症致兒為患

人參 白朮 茯苓各二錢 陳皮 半夏 甘草各一錢

右每服二三錢薑棗水煎

補中益氣湯 治中氣不足困倦發熱或元氣虛弱感冒風寒

諸症或乳母勞役發熱致兒為患

黃芪炙 人參 白朮炒 甘草炙

當歸 陳皮各五分 升麻 柴胡各二分

右薑棗水煎

香砂助胃膏 治胃寒吐瀉乳食不化

人參 白朮炒 白茯苓各五錢 甘草炙

丁香各一錢 砂仁各四分 白芷各四分 白芫荽各四分

肉苳蔻各四分 陳皮各四分 乾山藥各四分

右為末煉密丸茨實天每服二三丸米飲磨化

人參養胃湯 治外感風寒內傷生冷寒熱如瘧或嘔逆惡心

平胃散中用厚朴佐以蒼朮正為泄上焦之濕平胃土不使  
大過而致其和耳非溫補脾胃也

人參

厚朴

蒼朮

半夏

草薺仁

虛弱不能者宜此

藿香

茯苓

甘草

錢灸二

橘紅

五分

右每服二三錢薑三片烏梅一箇水煎

大蕪荑湯

治小兒脾疳少食發熱作渴大便不調髮黃脫落

面黑便清鼻下生瘡能乳嗜土等症

蕪荑

山梔

黃栢

甘草

黃連

防風

麻黃

羌活

柴胡

各三分

白朮

茯苓

當歸

右作二劑水煎

肥兒丸

治食積五疳頸項結核髮稀成穗發熱作渴等症

黃連

神麩

木香

檳榔

破滯氣

肉苳蔻

史君子

麥芽

炒各四兩

右為末麩糊丸麻子大每服三五十九米飲下良久用五味

異功散一服以助胃氣

九味蘆薈丸

治小兒肝脾疳積體瘦熱渴大便不調或癩癧

結核耳内生瘡等症

蘆薈

胡黃連

黃連

木香

蕪荑

青心

白雷丸

鶴虱草

麩

右為末蒸餅糊丸麻子大每服一二錢空心白湯下

黃連丸

治疳勞

小兒直訣卷之四

八

洪六

黃連

五錢 汁浸 曬

瓜蒌根

烏梅肉

杏仁

焙 浸 去皮

石蓮

各二錢

右為末牛膽汁浸糊丸麻子大每服一二十九煎烏梅薑蜜湯下

木香丸 治冷疝

木香

青黛

檳榔

肉豆蔻

麝香

各一錢 五分

續隨子

去油

蝦蟆

三箇 煨 存性

右為末蜜丸菜豆大每服三五丸煎薄荷湯下  
愚按前方消疝清熱逐水破氣之劑然云冷疝者乃陽氣虛而脾胃冷也其檳榔續隨子恐導損真陰剋伐陽氣治者之

胡黃連丸 治熱疝

胡黃連

各五錢

朱砂 二錢 另研

右為末填入猪膽內以線札懸掛銚中淡漿水煮數沸取出研入麝香麝香各二錢飯和丸麻子大每服一二十九米飲  
愚按前症當以本方為主佐以四君子加蕪荑脾胃虛甚者以四君子加蕪荑為主以前丸為佐  
如聖丸 治冷熱疝瀉

史君子

取肉 一兩

胡黃連

川黃連

白蕪荑

各二錢 兩五錢

麝香

五分 另研

乾蝦蟆

五箇 酒 煮 粹 膏

右為末以蝦蟆膏杵丸麻子大每服一二十九煎人參湯下  
薛按疝之為患乃肝脾虛熱津液乾涸之症前方乃專於治疝清熱之劑若脾胃虛弱者當佐以六君子湯調補脾胃使邪氣退庶可收全功也

蘭香散 治鼻疝赤爛

薛氏醫案 小兒疝氣卷之四

蘭香葉二錢 燒灰

銅青

輕粉各五錢

右為末乾貼

白粉散 治諸疔瘡

海螵蛸三分

白芨二分

輕粉一分

右為末先用漿水洗拭乾貼

薛按前二方治表之藥如未愈用四味肥兒丸以治其內

四味肥兒丸

治食積脾疳目生雲翳口舌生瘡牙根腐爛後

熱瘦怯遍身生瘡又治小便澄白腹大青筋一切疳症

黃連炒

蕪荑炒

神麩

麥芽炒各等分

右為末水糊丸桐子大每服一二十九空心白滾湯下

蟾蜍丸

治無辜疔症一服虛熱退二服煩渴止三服瀉痢愈

一枚夏月滿渠中取腹大不跳不鳴身多癩者

右取蟾蜍一杓置桶中以尿浸之却將蟾蜍跌死投與蛆食

一晝夜用布袋盛蛆置急流中一宿取出瓦上焙乾為末入

麝香一字粳米飯丸麻子大每服二三十丸米飲下其效神

蕪荑散 治蟲動口內流涎

白蕪荑

乾漆炒各等分

右為末每服五六分米飲下

安蟲散 治蟲動心痛

胡粉炒黃

檳榔

川練子

鶴虱各三錢

枯白礬二錢五分

右為末每服五六分痛時米飲調下

薛按蟲動之因多屬胃氣虛弱或聞飲食氣味而動前一方

乃化蟲之劑若因脾胃虛弱者須當調補中氣



史君子丸

治臟腑虛滑及疝瘦下利腹脇脹滿不思乳食

史君子

肉一兩 麵煨

甘草

訶子肉

半生半

厚朴

姜汁

青黛

陳皮

五分

右為末煉蜜丸芡實大每服三五丸米飲化下

白玉散 治丹瘤

白土

二錢 五分

寒水石

五錢

右為末用米醋或新水調塗

薛按前方性味寒涼六腑受患毒發於表二便調和乳食如常固為可用若胃氣虛弱者反凝滯瘀血益增其患重者須吮毒血各聚於一處砭出以泄之遍身者當隨其患處各吮聚砭之更服仙方活命飲大便不通者更加大黃如不應用大連翹飲治法雖多無如砭法為良百日内患者難治

神功散

治瘡瘍腫膺作痛未成者敷之即散已潰者敷之即愈丹瘤用之尤妙但砭縫作痛

黃栢

炒

草烏

炒

血竭

各等分

右為末津調敷患處

柳華散

治熱毒口瘡

黃栢

炒

蒲黃

青黛

真正

人中白

煨各等分

右為末敷之

仙方活命飲

治一切瘡毒未成內消已成即潰此消毒排膿

止癰之聖藥也若膿出而腫痛不止者元氣虛也當補之

川山甲

白芷

防風

沒藥

甘草

赤芍藥

當歸尾

乳香

天花粉

貝母

金銀花

陳皮

各三錢

皂角刺 一錢

右每服二三錢酒水各半煎

場氣丸 治肚腹虛脹

胡椒 一兩

蝎尾 五錢 去毒

右為末麩糊丸粟米大每服一二十九陳米飲下

薛按前症屬脾肺虛水氣泛而喘急浮腫必兼溫補脾土以生肺金而氣自運行矣但前藥性屬辛熱雖能祛散寒邪而恐真氣反傷不可過劑

消積丸 治食積大便酸臭發熱

丁香 九箇

縮砂 十二箇

巴豆 二粒 去皮 心膜

烏梅肉 三箇

右為末麩糊丸黍米大每服五七丸溫水下

薛按前症若食積既去而熱不退或作嘔少食宜用五味異

功散以補胃氣或用四君子加藿香半夏以安中氣若兼泄瀉用六君子湯如不應加并麻柴胡以升補脾氣若久瀉不已宜用補中益氣湯以升補陽氣若虛寒加炮薑木香如不應兼以四神丸以補脾腎若體瘦潮熱口渴大便不調宜用肥兒丸以消疳積

保和丸 治食積

山查 二兩

神麩 二兩

半夏

茯苓 各一兩

陳皮

連翹

蘿蔔子 各五錢

右為末粥糊丸桐子大每服一二十九白湯下

清中解鬱湯 治脾氣虛弱飲食停滯鬱熱生痰或身發赤暈

白朮 炒

茯苓

陳皮

山梔 炒

山查

神麩 炒

麥芽 炒

川芎

桔梗

甘草 各五分

右每服二三錢水煎

四神丸 治脾腎稟虛泄瀉不食或不食去後不實或乳母患此致兒為患

肉苳蔻 二兩 補骨脂 四兩 五味子 二兩 吳茱萸 一兩

右為末用水二碗生薑八兩紅棗一百枚煮熟取棗肉和末丸麻子大每服二三十丸空心食前白湯下子母並服

香連丸 治赤白痢疾并水瀉暑瀉

黃連 淨二兩 吳茱萸 去梗十兩

右先將二味用熱水拌和入磁器內置熱湯中頓一日同炒至黃連紫黃色去茱用連為末每末四末入木香末一兩淡醋米飲為丸如麻子大每服四五十九丸白滾湯下

五苓散 治霍亂吐瀉躁渴飲水小便不利

澤瀉 五錢

猪苓

官桂

赤茯苓

白朮 各三錢

右為末每服一二錢白湯調下

薛按前症若津液偏滲於大腸大便瀉而小便少者宜用此藥分利若陰陽已分而小便短少者此脾肺氣虛而不能生水也宜用補中益氣湯加麥門五味虛火上炎而小便赤小者此肺氣受傷而不能生水也用地黃丸加麥門五味

大黃丸 治風熱便秘飲水

川芎 五錢

甘草 炙二錢五分

黑牽牛 五錢半

大黃 一兩

洗蒸

右為末糊丸麻子大每服數丸溫蜜水下

薛按前方乃內疎之峻劑審其因果屬臟內實熱方可用

白虎湯 治傷暑煩躁身熱痰盛頭痛口燥大渴

薛氏醫按

昆蟲

十一

卷六

知母一兩 石膏四兩 白粳米八錢 甘草炙五錢

右為末每服一二錢水煎

羌活散 治風邪所傷頭目昏眩痰涎壅滯肢節煩疼

羌活 前胡 麻黃 白茯苓 川芎

黃芩 甘草炙 蔓荆子 枳殼炒 細辛

石膏另研 菊花 防風各兩

右為末每服一二錢水煎

地骨皮散 治壯熱作渴

地骨皮 茯苓 甘草 柴胡 半夏 人參

知母各等分

右為末每服一二錢水煎

大羌活湯

羌活 獨活 防已 防風 黃芩

黃連 蒼朮 白朮 甘草炙 川芎

細辛各二錢 知母 生地黃各一錢

右為末每服一二錢水煎熱服

人參羌活散 治傷寒時氣頭疼發熱

人參 羌活 獨活 柴胡 前胡

桔梗 茯苓 枳殼炒 川芎 天麻

地骨皮 甘草炒

右入薄荷三葉水煎

薛按前方乃解肌發表化痰利氣之劑然元氣虛者宜用清

肺散

秘旨清肺散 治感冒發熱鼻流清涕或咳嗽吐痰輕者勿藥

薛按前方乃解肌發表化痰利氣之劑然元氣虛者宜用清肺散

自愈重者用此輕和之劑

橘紅

半夏炮

桔梗炒

川芎各五分

白茯苓

桑白皮

蜜炙各七分

甘草炙

防風各四分

薄荷

枯黃芩炒各三分

白朮一錢

右每服二三錢薑水煎

薛按前症若風邪退而痰熱不止但健中氣則痰自化而病

自愈若專用化痰利氣則中氣愈虛痰熱愈甚矣

敗毒散 治傷寒時氣寒熱咳嗽

人參

茯苓

甘草炒

前胡

川芎

羌活

獨活

桔梗

柴胡

枳殼炒各等分

右為末每服一二錢生薑薄荷水煎

薛按秘旨云小兒雖有感冒傷風鼻塞流涕發熱咳嗽以降

痰為主略加微解凡帶利敗毒非幼稚所宜或胃輕者不必

用藥候一二日自愈竊謂前症若手足冷或腹脹脾虛也用

六君子湯加柴胡升麻若腹脹或氣喘肺虛也用四君子湯

加柴胡升麻蓋肺虛則腠理不密外邪易感發表之後其邪

既去即補脾肺以實其表庶無變症矣

百部丸 治肺寒壅嗽微喘

百部炒

麻黃各三分

杏仁

四十箇微炒水煮

右為末用蜜丸皂子大每服一二丸薑湯化下

麻黃湯 治傷風發熱無汗咳嗽喘急

麻黃

去節三錢水煮去沫漉出晒乾

肉桂

甘草

杏仁

七箇去皮尖炒黃研膏

每服一錢水煎服以汗出為度自汗者不宜服

薛按前方乃發表出汗之劑審其寒邪在表宜用若邪既去

薛氏醫按

小兒直論卷之四

共六

宜補脾肺以實其表庶風邪不能再入往往表散之後熱嗽不退復行發表多變壞症

地黃清肺飲 治肺癆咳嗽痰唾稠粘

阿膠一錢 鼠粘子二分 馬兜鈴 甘草各五分

杏仁七枚 糯米十粒

右每服一錢水煎

葶藶丸 治傷風咳嗽面赤身熱痰盛喘促

甜葶藶隔紙 黑牽牛炒 杏仁炒黃 漢防已各一兩

右為末入杏膏蒸棗肉搗丸麻子大每服十九薑湯下

薛按前方行氣導濕之峻劑若脾肺虛熱而致諸症者當調

補中氣為主若果係前症宜用惺惺散參蘇飲清肺丸茯苓

牛夏湯選用之

惺惺散 治傷寒時氣風熱痰壅咳嗽

桔梗 細辛 人參 甘草炙 白茯苓

白朮炒 瓜蒌根各等分

右為末每服二錢入薄荷五葉水煎

參蘇散 治感冒風寒或腹脹少食泄瀉嘔吐或手足並冷喘

促痰涎

人參 紫蘇 陳皮 半夏 茯苓 枳殼炒 桔梗炒

前胡 乾渴 甘草炒各五分 木香三分

右為末每服一二錢水煎

茯苓半夏湯 治胃氣虛弱痰涎惡心或飲食不化嘔吐發搐

或睡卧不寧口流痰涎或乳母脾胃虛弱飲食不節以致兒

患前症亦宜用此藥王之

白木炒 茯苓 半夏 神麩炒各一錢 大麥炒一錢

陳皮 天麻各三錢

右每服一二錢水煎

甘桔散 治咳吐熱涎咽喉不利

甘草兩 桔梗一兩米泔浸焙

右為末每服二錢入炮阿膠半片水煎服

薛按前症若風熱蘊於肺而咳膿血用桔梗湯若心剋於肺

而吐痰涎用人參平肺散

桔梗湯 治咳嗽吐膿痰中有血已成肺癰症

桔梗炒 貝母 當歸酒浸 瓜蒌仁 枳殼麩炒

薏苡仁 桑白皮炒 百合蒸各一錢五分 五味子炒

甜葶藶炒 地骨皮 知母 甘草節 防已

黃芪炒 杏仁各五錢

右每服一二錢水煎

人參平肺散 治心火剋肺咳嗽喘嘔痰涎壅盛胸膈痞滿

人參 橘紅 甘草炙 地骨皮各五分

茯苓 知母炒各七分 五味子炒 青皮

天門冬各四分 桑白皮炒

右每服一二錢水煎

小柴胡湯 治傷寒溫熱患身熱惡風頭痛項強四肢煩痠寒

熱往來嘔噦痰實及治中暑病瘧

柴胡八錢 半夏湯炮 黃芩 人參各三錢 甘草炙二錢

右每服一二錢薑棗水煎

加味小柴胡湯 治乳母肝火發熱等症致兒為患即小柴胡

薛氏按 凡直快卷之四 共三十一

加山梔牡丹皮水煎子母並服以下做此

加味道遙散 治乳母肝脾氣血虛弱發熱致兒為患

當歸 白朮 茯苓 芍藥炒黃各一錢 柴胡 牡丹皮

山梔炒 甘草炒各五分

右水煎服

柴木參苓湯 治肝火血熱遍身瘙癢或起赤暈或筋攣結核

白朮炒 人參 茯苓各一錢 柴胡 川芎

山梔 芍藥炒 甘草炒五分 熟地黃日製歸各八分

右水煎服

芍藥參苓散 治肝木剋脾土目昏面青食少體倦

芍藥炒 人參 茯苓 白朮 陳皮各七分

柴胡 山梔炒 甘草炒五分

右水煎服

梔子清肝散 治三焦或足少陽經風熱耳內作痒生瘡或出

水疼痛

柴胡 梔子炒 牡丹皮各錢 茯苓 川芎

芍藥 當歸 牛蒡子炒各七分 甘草

右水煎服

龍膽瀉肝湯 治肝經濕熱或囊癰便毒小便澀滯

龍膽草酒炒五分 車前子炒 木通 當歸尾

澤瀉各三分 甘草 黃芩 生地黃

山梔各三分

右水煎服

茵陳湯 治身熱鼻乾汗出二便赤澀濕熱發黃

薛氏醫案 小兒痘後發熱之四 七 洪七十



茵陳六錢 梔子一箇 大黃二錢

右每服一錢水煎

大連翹飲 治積熱大小便不利或痘後餘毒 體患瘡或丹瘤遊走不止

連翹 藿麥 荆芥 木通 赤芍藥

當歸 防風 柴胡 滑石 蟬退

甘草各錢 山梔炒 黃芩炒各五分

右每服一二錢水煎

清涼飲 治消中能食而瘦口乾自汗大便結燥小便頻數

羌活 柴胡 炙甘草 知母酒製 黃芪

黃芩酒製各二錢 生甘草 防已 生地黃酒製

防風各五分 當歸六分 紅花少許 桃仁五箇 杏仁

升麻四分 石膏 黃柏 草龍膽各一錢五分

右每服一二錢水煎入酒少許服

四順清涼飲 治臟腑有熱類赤作渴四肢驚掣大便秘瀉或

風熱結核頭面生瘡目赤咽痛一切有餘之症

赤芍藥 當歸 甘草 大黃各等分

右每服一錢水煎

黃連香薷飲

香薷四兩 厚朴二兩 黃連一兩

右每服一二錢將朴連同生薑炒令紫色入香薷水酒各一

盞煎冷服

金匱加減腎氣丸 治脾腎虛腰重脚腫小便不利或肚腹腫

脹四肢浮腫或喘急痰盛已成壘有此症多因脾胃虛弱治

失其宜元氣復傷而變者非此藥不救

白茯苓三兩 附子炮五錢 川牛膝 肉桂 澤瀉

車前子 山茱萸 山藥 牡丹皮各一兩

熟地黄四兩 搗碎 酒拌杵膏

右為末和地黃膏加煉蜜杵丸桐子大每服一二十九空心

米湯下

五色丸 治五癩

朱砂 真珠各五錢 水銀 雄黃各一錢 黑鉛三兩 同水

右為末煉蜜丸麻子大每服三四丸煎金銀薄荷湯下

愚按前症有因驚因風因食之不同雖痰迷心竅然當辨

氣為主

斷癩丹 治癩差後變症不止

黃芪蜜炙 釣藤鈞 細辛 甘草炙各五錢 蛇退酒炙

蟬蛻去土 牛黃一字另研

右為末煮棗肉為丸麻子大每服五七丸人參煎湯下

宣風散 治驚風

檳榔二箇 陳皮 甘草各錢 牽牛四兩 半生半炒

右為末每服三五分蜜湯調下

愚按肝氣為陽為火肝血為陰為水故肝氣熱則生風風熱

搏則驚搐而肝血必損也然有餘當認為不足若屢服利驚

宣風之劑未免虧損脾胃以成慢驚矣慎之

補銀丸 治風涎瞶熱及乳食不消腹脹喘促

巴豆 水銀各五錢 京墨八錢 火燒 黑鉛二錢 水銀 麝香五分 另研

右為末陳米粥丸菴荳大每服二三丸煎薄荷湯下

愚按前方治癩癩驚搐消積下痰之藥也其用牽牛巴豆等  
蓋以痰飲癩積結聚堅固非此不能除故潔古張先生云為  
斬關奪旗之將形病俱實者用之誠有回生起死之功必須  
詳審不可輕率

牛黃丸 治驚熱消疳積

雄黃研水飛 牽牛各一錢 天竺黃二錢

右為末麪糊丸粟米大每服五七丸薄荷水下

紫霜丸 治驚積

代赭石二錢水飛 杏仁二十一箇 巴豆二十一粒  
去尖皮 去皮 心膜

右為末飯丸粟米大每服五七丸煎皂角仁湯下

利驚丸 治急驚

天竺黃二錢 輕粉 青黛各一錢 黑牽牛少五錢

右為末煉蜜丸豌豆大每歲一丸薄荷水化下  
白餅子 治腹中有癖但飲乳嗽而吐痰涎

滑石 輕粉 半夏湯浸 南星各一錢 巴豆二十四粒  
煎水煮 另研 去皮

右為末糯米飯丸菜豆大捻作餅每服二三餅煎葱白湯下  
薛按前四方乃斬關奪門起死回生之重劑也必審形病俱  
實方可施之恐至失手命在反掌經云邪之所湊其氣必虛  
留而不去其病乃實實者病氣寔而形氣則虛也東垣先生  
云形病俱實者當瀉不當補形病俱虛者當補不當瀉

涼驚丸 治驚疳

龍膽草炒焦 防風 青黛各二錢 釣藤釣二錢 黃連炒一錢

龍腦一錢 牛黃 麝香各二分

右為末麪糊丸粟米大每服十九丸煎金銀花湯下

薛按前丸心肝二經清熱祛風化痰散氣之寒劑蓋府者津液乾涸之症不宜多服恐傷胃氣無以滋腎水生肝血也  
羌活膏 治脾虛肝熱熱盛生風或吐瀉或悞藥變為慢驚之症

羌活 川芎 人參 白附子炮 赤茯苓各五錢 天麻 一兩  
白僵蚕酒炒 乾蝎炒去毒 白花蛇肉酒乾  
雄黃 辰砂各另研 附子炮 防風 麻黃去節  
肉苧蔻 鷄舌香 藿香葉 沉香  
木香各二錢 輕粉 眞珠 牛黃各一錢 龍腦二分  
麝香一錢各另研

右爲末煉蜜丸豆大每服一二丸薄荷湯化下  
薛按前方藥味雜亂果脾氣虛而成慢驚者當審用之恐發

散真氣重損陰血故也

抱龍丸 治傷風溫疫身熱昏睡風熱痰實壅嗽又治驚風潮搐及蠱毒中暑

雄黃二錢 辰砂五錢 天竺黃 一兩 牛胆南星四兩 麝香五分  
右爲末甘草湯丸皂子大每服一丸白湯化下

薛按前丸化痰祛邪清熱之功居多屬肝心實熱而致者用之殊效若脾肺虛弱而見昏睡痰嗽當用寶鑑天麻散以調補元氣

小續命湯 治中風不省人事涎鳴失音肢體反張或時厥冷  
麻黃去節 人參 黃芩 川芎 芍藥 甘草炒  
杏仁去皮 漢防已 官桂各五錢 防風七錢  
附子炮去皮臍二錢

右各另為末和勻每服一錢薑棗水煎有熱減桂附  
寶鑑天麻散 治急驚脾胃虛弱或變慢驚者

半夏七錢 天麻二錢五分 甘草炙 白茯苓 白朮各二錢

右入生薑三錢磁器內水煮候乾為末每服一錢五分薑棗湯調下

釣藤釣飲 治吐利脾胃虧損虛風慢驚

釣藤釣炒 仁蟬殼 防風炒 人參 麻黃

白僵蚕炒 天麻 蝎尾去毒炒 甘草炙

川芎各二錢五分 麝香錢另研

右為末每服一二錢水煎

薛按慢驚之症屬脾胃虧損所致前方乃辛溫散表之藥而無調補之功須審用之

大青膏 治傷風吐瀉身溫涼熱

天麻 青黛各一錢 白附子 乾蝎去毒 烏梢蛇肉酒

生砂五分 天竺黃二錢 麝香分

右為末生蜜和膏每服一豆粒許月中兒用半粒薄苛湯服  
愚按大青膏乃表散之劑也必外邪蘊結於肺而肺氣之未損者乃可施之况前症屬脾肺氣虛而邪之所湊必以固脾胃為主否則虛虛之禍恐不能免矣

溫白丸 治泄瀉瘦弱冷疝洞利及久病而成慢驚

天麻五錢 白僵蚕炮 白附子 乾蝎去毒 天南星湯炮焙

右為末麪糊丸菴豆大每服十九米飲下

愚按前症屬脾氣虛寒無陽之症無風可散無痰可逐當兼用六君子湯十二味異功散木香散

參芪四聖散 治痘瘡已出至六七日不起發不成膿

人參 黃芪炒 白木炒 茯苓 當歸 芍藥炒  
川芎各五分 紫葢 木通 防風各三分 糯米二百粒  
右作二劑水煎服

陳氏木香散

木香 大腹皮 人參 桂心 赤茯苓 青皮  
前胡 訶梨勒 半夏製 丁香 甘草各五分  
右每服二三錢薑水煎

薛按前方若痘瘡已出未愈之間其瘡不光澤不起發不紅活五七日內泄瀉作渴或肚腹作脹氣促作喘或身雖熱而腹脹足指冷或身熱作渴或驚悸腹脹或汗出不止或寒戰咬牙瘡不結痂此皆脾胃虛寒津液衰少急用此藥治之若誤認為寔熱用寒涼之藥及飲蜜水生冷瓜果之類必不治

十二味異功散

木香二錢半 官桂二錢 當歸三錢半 茯苓 白木各錢  
人參 陳皮 厚朴製 半夏製 丁香  
肉苳蔻各二錢半 附子炮一分

右每服二三錢薑棗水煎

薛按前方若痘瘡不光澤不紅活不結醫謂之表裡俱虛宜用此藥治之若悶亂煩渴吐瀉不食腹痛腹脹痰喘氣急謂之表裡虛寒急用此藥送苳蔻丸或十日至十一日當醫不醫煩渴咬牙手足並冷飲沸湯而不知熱此陽虛脫陷急用此湯救之亦有復生者

百祥丸 治痘瘡黑陷及嗽而吐青綠水

紅牙大戟陰乾棗水煮數去骨復入元汁中煮

右焙乾為末水丸粟米大每服十九赤脂麻湯下

薛按前方治痘瘡黑陷耳聾冷咬牙吐瀉者乃脾土虛敗寒水反侮歸腎之惡候也用百祥丸瀉之急以四君子加丁香陳皮木香厚朴炮薑以溫補脾土身熱飲水黑陷復起十枚一二蓋此症因脾土虛敗寒水乘侮陳文秀先生云若治寒水於既侮之後何不保脾土於未敗之先此發前人之未發况前藥必藉脾胃之氣運及於腎而纔瀉之吾恐胃氣先傷而莫能及然非錢公之明見不敢投非古昔之元氣不敢用治者審焉

牛李膏 治痘瘡黑陷

牛李子

石柈汁石器內熬膏每服皂子大煎杏膠湯化下

雄黃散 治痘後牙齦生疔蝕瘡

雄黃一錢 銅綠二錢

右同研細量瘡大小乾糝其上

化毒丹 治胎毒及痘後頭面生瘡眼目腫痛

生地黃 熟地黃 天門冬 麥門冬 玄參 各三

甘草 甜硝 各二 青黛 一兩 五錢

右為末煉蜜丸芡實大每服一九白湯化下

薛按前方生血涼血解毒寒中之劑用之得宜殊有良驗

括蕒湯 治慢驚

括蕒根 一錢 白甘遂 一錢

右慢火炒黃為末每服二三分煎薄荷麝香湯下

薛按徐用誠云錢氏治慢驚用括蕒湯恐傳寫誤耳蓋驚主

風木甲木屬陽在急易治乙木屬陰病緩難治况小兒五臟之氣未實神氣未充而白病慢驚之症非病後及吐瀉脾胃虛損而得者慎勿用此峻厲之劑

溫驚丸 治慢驚風症

牛膽南星一錢 天竺黃五錢 龍腦一錢 紫臘脂一錢

右各另為末用黃牛膽汁丸芡實大每服半丸砂糖湯化下

薛按慢驚屬脾胃無陽肝木所勝之寒症故用溫驚丸以溫

之但所用之藥乃辛散陽氣祛逐痰涎治者審之

人參理中丸 治中氣虛熱

人參 白朮炒 甘草炙各等分

右為末姜汁糊丸芡豆大每服二三十丸白湯下

調中丸 治脾胃虛寒

白朮 人參 甘草炒各五錢 乾薑炮四錢

右為末用蜜丸芡豆大每服二三十丸白湯下

薛按前二方本經自病之藥即人參理中丸也若腎水侮土

而虛寒者當加半夏茯苓陳皮或嘔吐更加藿香泄瀉加木

張氏溫脾散 治脾胃虧損腹脇虛脹乳食不進困倦無力

訶子肉 人參各七錢 白朮 木香 桔梗 茯苓

藿香 陳皮 黃芪各五錢 甘草炙二錢半

右每服二三錢姜棗水煎

薛按前方治脾肺虛弱之症若肺病已去前症未已但用六

君子湯以調補脾胃

歸脾湯 治乳母脾經氣鬱致兒為患

人參 白朮 茯苓 黃芪 龍眼肉各二錢 遠志一錢

薛氏醫安



酸棗仁

木香

甘草各三錢

右姜棗水煎服加柴胡山梔名加味歸脾湯

越鞠丸

治乳母六鬱傳兒為患或胸滿吐酸齒痛瘡疥等症

蒼朮

神麴炒

香附子

山查

山梔炒

撫芎

麥牙等

右為末水調神麴糊丸桐子大每服二三十丸白滾湯下子母並服

清心丸

治驚熱煩躁

人參

茯神

防風

朱砂

柴胡各二錢

金箔三十片

右為末煉蜜丸桐子大每服一二九竹瀝調下

安神丸

治邪熱驚啼心肝壯熱面黃頰赤

麥門冬焙

心牙硝

白茯苓

乾山藥

寒水石

甘草各五錢

朱砂兩

龍腦二分

右為末煉蜜丸芡實大每服半丸砂糖水化下

薛按前方降火化痰辛散寒涼之劑不宜過服恐反傷脾胃

也若睡中驚悸不安宜用秘旨安神丸若因乳母脾氣鬱熱

致兒為患者宜用加味逍遙散若因乳母怒氣肝經發熱致

兒為患者宜用加味小柴胡湯若因乳母飲酒胃經發熱致

兒為患者宜用葛花解醒湯

葛花解醒湯

治乳母酒後乳元遺熱為患

白豆蔻

砂仁

葛花各五錢

乾生薑

白朮

澤瀉

神麴炒黃各二錢

白茯苓

陳皮

人參

猪苓各二錢

木香五分

青皮三錢

右為末每服二錢白湯調服

薛按前湯氣味辛散不得已而用之耳蓋酒病服之雖效類

服則陰損元氣折人長命可不慎哉

花大膏 治夜啼

燈花 一匙

右塗乳上令兒吮之

薛按前症有因停乳腹痛者有因陰盛發躁者有因寒盛腹痛者有因乳母鬱悶怒氣傳兒者有因乳母停滯傳兒者治法說見本論

釣藤散 治夜啼

釣藤鈞 茯神 茯苓 川芎 木香 當歸 各一錢

甘草 五分

右為末每服二錢姜棗水煎

六神散 治面青啼哭口出氣冷或泄瀉不乳

人參 山藥 白朮 各五錢

甘草 二錢

白茯苓 扁豆 各一兩

右為末每服一錢姜棗水煎

當歸散 治夜啼不乳

當歸 白芍藥 人參 各二錢 甘草 一分

桔梗 陳皮 各一錢

右為末每服一二錢水煎灌之

蟬蛻釣藤散 治肚衷驚啼

釣藤 天麻 茯苓 川芎 白芍藥 各一錢 甘草

蟬蛻 各一錢

右每服一錢燈心水煎

羚羊角丸 治行遲

羚羊角 虎脰骨 醋炙 生地黄 焙 酸棗仁 白茯苓 各一錢

肉桂

防風

當歸

黃芪

各二錢五分

右為末煉蜜成劑每服一皂子大白湯化下

菖蒲丸

治心氣不足不能言語

石菖蒲

赤石脂

各三錢

人參

丹參

天麥

門冬

各去心

右為末蜜丸棗豆大每服十丸若病後腎虛不語宜服地黃

丸

止汗散

治睡而自汗

故瀉扇煨

右為末每服三錢溫酒調下

香瓜丸

治遍身出汗

胡黃連

川大黃

煨

柴胡

鱉甲

醋炙

黃栢

黃連

盧薈

青皮

各等分

右為末將黃瓜一箇去穰納藥煨熟杵和麪糊丸棗豆大每服三五丸新水下

薛按自汗屬陽虛盜汗屬陰虛若心經血虛用團參湯腎經虛熱用地黃丸血氣虛用人參養榮湯之類胃氣虛用六君子湯或用一味白朮炒為末以浮麥炒濃煎湯調服

當歸六黃湯

治血氣不足虛火內動盜汗不止

當歸

熟地黃

黃芪

炒

黃栢

已下俱

黃芩

黃連

生地黃

各等分

右每服二錢水煎

團參湯

治心血虛熱自汗盜汗

人參

當歸

各等分

右用猪心一片每服三錢水煎服

芪附湯 治稟賦氣虛陽弱自汗不止肢體倦怠或大病後陽氣虧損並急服之多有生者

黃芪 蜜炙 附子 炮等分

右每服一錢薑水煎

參附湯 治稟賦不足上氣喘急自汗盜汗或病久陽氣脫陷急宜服之

人參 五錢 附子 炮一兩

右每服一錢姜水煎

人參養榮湯 治脾肺俱虛發熱惡寒肢體瘦倦食少作瀉或久病虛損口乾食少欬而下痢驚熱目汗

白芍藥 一錢五分 人參 陳皮 黃芪 蜜炙 桂心 當歸

白朮 炒 甘草 炙各一錢 熟地黃 五味子 炒

集  
其  
毒  
局

如

局

下